

Siunnersuummut oqaaseqaatit

## **Nalinginnaasunik oqaaseqaatit**

### **1. Aallarniut**

Inatsisartut inatsisaat siunertaqarpoq qularnaassallugu sulineramik inuussutissarsiuteqartut paasissutissanik aamma atorfeqarneq pillugu pappialanik uppersaatinik tunineqartussaanut, tamatumani pissutsinut pingaaruteqartunut tunngasunik.

Atorfeqarnermi pissutsinut pingaaruteqartunut atatillugu uppersaatinik suliaqartarneq illuatungeriit akornanni akkerliissuteqartoqalersarneranik annikinnerutitsisarpoq, amerlasuutigut akkerliissutaasut atorfeqarnermi atugassarititaasut qanoq ittuunerannik imaqartarmata.

Atorfeqarnermi atugassarititaasunik uppersaaneq peqataassaaq suliffeqarfinni toqqissimanerusumik atugarissaarfiunerusumillu ingerlatsinerup aqutissiuunneqarnissaanut, sulineramik inuussutissarsiuteqartunut aamma sulisitsisunut, illugiillutik atorfeqarnermut atatillugu allakkiamut innersuussisoqarsinnaaneritigut, atugassarititaasunik ersarinnerusumik qulaajaasarneni.

Naatsorsuutigineqarpoq sulisinnaasut akornanni nuttarnepup annertuneruleriartornissaa, atorfeqarnernilu atugassarititaasartut isumaqatigiissutit assigiinngitsut amerlasuujuneri isiginiarlugit pisariaqartinneqarpoq sulineramik inuussutissarsiuteqartut pisinnaatitaaffeqarnissaat atorfeqarnermi atugassarititaasunik erseqqissaasoqartarnissaanik, aamma siusinnerusukkut suliffigisimasat uppersarneqartarnissaannut periarfissaqarnissamik.

Atorfeqartitsinermi atugassarititaasunik uppersaasarneq aqutissiuusseqataassaaq suliffeqarnermi atugassarititaasut akimut ersittuunerulernissaannut.

Inatsisartut inatsisaat sulineramik inuussutissarsiuteqartunut tamanut atuutissaaq, apequtaatinnagu pisortani imaluunniit namminersortuni suliffeqarneq.

Inatsisartut inatsisaat toqqaannartumik sunniuteqassanngilaq atorfeqarnermut atatillugu isumaqatigiissutaasartunut namminernut, taamalu tunngaviatigut atorfeqarnermi atugassarititaasunut sunniuteqassanani. Taamaattoq Inatsisartut inatsisaat annertusisamik aqutissiuussissaaq atorfeqarnermi atugassarititaasut pillugit paasissutissiisarnernut, taamalu "isertuussaasartut" akkerliissutaasut saqqummersissallugit, aatsaat illuatungeriit akkerliissuteqalernerisigut saqqummertaraluartut.

Pisortani atorfeqarnermut atatillugu isumaqatigiissutaasuni assigiinngitsuni malittarisassanik ersarissunik peqareerpoq, sulisitsisunik pisussaaffiliisunik paasissutissiisarnissanut atorfeqarnermut tunngasutigut. Inatsisartut inatsisaat atuutissanngilaq sulisitsisup minnerpaatut sulineramik inuussutissarsiuteqartumut atorfeqarneq pillugu paasissutissiisussaaffigeriigaani, Inatsisartulli inatsisaanni uani pisussaaffiusutulli ataatsimoorussanik isumaqatigiissutisigut.

Inatsisartut inatsisaat piunasaqaateqarpoq paasissutissat sulinermik inuussutissarsiuteqartumut tunniunneqartut suliarineqartarnissaannik oqaatsit sulinermik inuussutissarsiuteqartup paasisinnaasai atorlugit.

## **2. Siunnersuummi qulequttat pingaarnerit**

Inatsisartut inatsisaata kingunerissavaa sulinermik inuussutissarsiutini sulisitsisunut tamangajannut pisussaaffik, atorfeqarnermi atugassarititaasut pingaarnerit pillugit sulinermik inuussutissarsiuteqartumut allaganngorlugit paasissutissiisarnissaannut, ilanngullugit sulisitsisup kinaaneranik, suliffiup sumiiffianik, piffissamik suliffiusartumik, akissarsianut atugassarititaasunik, sulinngiffeqartarnermik, soraarnissamut soraarsitsinissamullu siumoortunik piffissalersuutinik, sumiiffimmut allamut suliarortarnermut il. il. tunngasut.

Sulinermik inuussutissarsiuteqartoq pisinnaatitaaffeqassaaq sulisitsisumiit immikkut ajunngitsorsiaqarnissamik, sulisitsisup paasissutissiisussaanini eqqortissimangippagu.

## **3. Pisortanut aningaasaqarnikkut aamma allaffissornikkut kingunerisassai**

Inatsisartut inatsisaat aningaasaqarnikkut annertunerusumik kinguneqartussaannigilaq.

Kommunit aamma Namminersorlutik Oqartussat ullumikkut atugarereerpaat - sulisitsisuunermikkut - atorfeqarnermut atatillugu allagartaliisarneq.

Naatsorsuutigisariaqassaaq annikinnerusunik atorfeqarnermut atugassarititaasunik pilersinneqareersunik misissuisoqartariaqartarnissaa.

Siunnersuutip allaffissornikkut aningaasaqarnikkullu kingunerisassaanut naatsorsuutigineqarneranut piunasaqaataavoq kommunit aamma Namminersorlutik Oqartussani Aningaasaqarnermut Sulisoqarnermullu Aqutsisoqarfiup pisortat HR-IT pillugu ataatsimoorussamik aaqqiissut atulereersimassagaat. IT pillugu aaqqiissut sulii ineriartortinneqarpoq.

IT pillugu aaqqiissut 2023-p qeqqani atulereqarnissaa naatsorsuutigineqarpoq.

IT pillugu aaqqiissutip naammassinissaanik piunasaqaat tunngavigalugu, inatsisip atortuulersinnissaa inaarutaasoq Naalakkersuisut nalunaarummik akuersissuteqarneratigut pissaaq.

Tamatuma saniatigut naatsorsuutigineqanngilaq allaffissornikkut aningaasaqarnikkullu immikkut eqqaasariaqartunik kinguneqarnissaa.

## **4. Aningaasaqarnikkut allaffissornikkullu inuussutissarsiortunut kingunerisassai**

Naatsorsuutigisariaqassaaq piffissamut sivikinnerusumut aningaasatigut allaffissornikkullu inuussutissarsiortunut kinguneqarnissaa. Allaffissornikkut unammilligassaasunik kinguneqassaaq paasissutissiisutaasartussanik naammattunik paasissutissartalinnik suliaqartarnermut atatillugu, aamma sulisitsisup pisussaaffigisani naammassisareersimangippagit.

Taamaattoq naatsorsuutigineqanngilaq piffissap ikaarsaariarfiusussap saniatigut allaffissornikkut aningaasaqarnikkullu allanik kinguneqarnissaa. Inatsisartut inatsisaata siunertaraa atorfeqarnermi atugassarititaasunik ersarissunik akimullu ersittunik peqarnissaa, tamannalu ungasinnerusumut isigaluni inuussutissarsiortunut iluaqutaassaaq. Soorlutaaq

atorfeqarnermut isumaqatigiissutinut atatillugu akerleriissutaasartut annerusutigut pinngitsoorneqartalissasut.

**5. Avatangiisinut, pinngortitamut innuttaasullu peqqissusiannut kingunerisassai**  
Inatsisartut inatsisaat avatangiisinut aamma pinngortitamut kinguneqartussaangilaq.

Inatsisartut inatsisaat aqutissiuusseqataassaaq suliffeqarfinni atugarissaarnerulernissamut toqqissisimanerulernissamullu.

**6. Innuttaasunut kingunerisassai**

Naatsorsuutigineqangilaq Inatsisartut inatsisaat allaffissornikkut imaluunniit aningaasaqarnikkut innuttaasunut kinguneqassasoq, naatsorsuutigineqarlunili sulinermik inuussutissarsiteqartut atugaannik pitsaanerulersitsisussatut.

**7. Allatigut malunnaatilinnik kingunerisassai**

Naatsorsuutigineqangilaq Inatsisartut inatsisaat allatigut malunnaatilinnik kinguneqarnissaa.

**8. Oqartussanik aamma kattuffinnik tusarniaaneq il.il.**

Siunnersuut tusarniaassutigineqarsimavoq, tamatumani aamma tamanut ammasumik Naalakkersuisut tusarniaavittut nittartagaatigut [www.naalakkersuisut.gl](http://www.naalakkersuisut.gl) piffissami 12. november 2021 - 10. december 2021.

Tusarniaanermut akissutit tusarniaanermut atatillugu allakkiami sammineqarput. Innersuunneqassaaq ilanngussaq 1.

## **Inatsisartut inatsisaanni immikkoortunut ataasiakkaanut oqaaseqaatit**

### *§ 1-imut*

#### **Imm. 1-imut**

Inatsisartut inatsisaat aallaavittut sulinermik inuussutissarsiuteqartunut tamanut atuutissaaq, ilanngunnagit qaammat ataaseq ataallugu sivisussusilimmik sulisinneqartartut, aamma ilanngunnagit agguaqatigiissillugu sap. akunneranut akunnerit 15-at ataallugit sulisartut.

Agguaqatigiissitsinerummat sulinermik inuussutissarsiuteqartoq sap. ak. ataatsimi akunnernik 15-nik qaangiisimappat sulisitsisoq ilisimatitsisussanngussanngilaq, inatsisartut inatsisaat naapertorlugu.

Naalackersuisut pisinnaatitaapput imm. 7 naapertorlugu aalajangersaanissamut atorfeqarnerit qanoq ittut Inatsisartut inatsisaanni pineqartunut ilaassanngitsut. Killiliinerup kingunerissavaa ilaatigut aalajangersimasuunngitsunik suliffeqartartut Inatsisartut inatsisaata atuuffianut ilaannginneqannginnissaat.

Inatsisartut inatsisaata piffissami atortinneqarfigisassaa tassaavoq atorfeqarneq qaammammit ataatsimit sivisunerusoq. Assersuutigalugu sulisuusoq qaammatip 8-ani aallartissimappat sulisitsisup sulisuusumut paasissutissat tunniussimassavai qaammatip tulliani kingusinnerpaamik 8-aani. Tamatumani apeqqutaanngilaq sulisuusoq ulloq taanna sulinnigiffeqarnerisoq.

Atorfeqarsimanerup sivisussusianik qaammammik tunngaviliineq aallaaveqarpoq amerlasuutigut atorfeqarnerup aallartisisimalernerani akerleriissutaasunik pisoqartarneranik, soorluttaaq piffissaq misilitsiffiusoq amerlasuutigut qaammatinit arlariinniit sivisunerusanngitsoq. Pinngitsoorumallugu nalornissuteqalernissaq atorfeqarnerup misilitsinnerrnersoq, piffissalikkamik sulilersitsinerunersoq imaluunniit ataavartumik atorfinitsinerunersoq siusissukkut unitsinneqartutut isigineqarsinnaanera, pingaaruteqassaaq atorfeqarnermut upernarsaatip aamma qaammatialuinnarni atorfeqartunut atuunnissaa.

Qaammammit ataatsimit sivisunerusoq ima paasineqassaaq, isumaqatigiissummi ersarissasoq atorfeqarneq qaammammit ataatsimit sivisunerussanngitsoq.

Uteqqiasumik suliffeqartarneq sap. ak. 4-anik sivisussusilimmik, sivikitsukkaanik suliffiunngitsunik akunneqartoq, ataatsimoortumik atorfeqarnertut naatsorsorneqassaaq.

#### **Imm. 2-mut**

Suliffeqarnermi illuatungeriit qinersinnaavaat Inatsisartut inatsisaanni uani aalajangersakkanik annerusumik atuinissaaq, Inatsisartut inatsisaanni aalajangersarneqartut saniatigut.

Suliffeqarnermi illuatungeriit isumaqatigiissutit aqputigalugit sulisitsisup paasissutissiisussaanera aaqqissuuppasuk, tamatuma kingunerissavaa apeqqutit akerleriissutaasut aallaaviusutut isumaqatigiissutinik unioqqutitsinertut nalinginnaasutut suliarineqartassasut.

#### **Imm. 3-mut**

Inatsisartut inatsisaata matuma imarsiortunut atuutinnginneranut tunuliaqutaavoq suliaasaqarfimmi tassani atugassarititaasunik allatut ittunik atugaqartoqarnera.

Imm. 4-mut

Taaguut sulineramik inuussutissarsiuteqartumik Kalaallit Nunaanni inatsiseqarnermi nalinginnaasumik nassuiarneqanngilaq, taaguut inatsisini suliaasaqarfinnilu assigiinngitsuni immikkut nassuiaaserneqartarluni.

Inatsisartut inatsisaat una siunertaqarmat sulineramik inuussutissarsiuteqartut paasissutissanik tunineqartartussaanerannik qularnaarinissamik, sulineramik inuussutissarsiuteqartumik paasinnineq siammasissumik paasineqartassaaq.

Taaguummik sulineramik inuussutissarsiuteqartumik paasinnineq tigussaasunik tunngaveqartumik isumaqarpoq sulisitsisup naatsorsuutigissagaa sulineramik inuussutissarsiuteqartup pissarsiassai, akissarsiai il.il. akileraarutaasussaappata akileraartarnermut inatsimmik tunngaveqartumik, sulisitsisoq pisussaaffeqartoq Inatsisartut inatsisaat una naapertorlugu paasissutissiisarnissaminik.

Nammineq piumasutsumik aamma akissarsiaqarani sulinerit Inatsisartut inatsisaanni uani ilaangillat.

Imm. 5-imut

Inatsisartut inatsisaata siunertaraa sulineramik inuussutissarsiuteqartup atorfeqarnermut atatillugu uppersaatiniik paasissutissinneqartarnissaa, aamma atorfeqarnermi isumaqatigiissummi atugassarititaasunik pingaaruteqartutigit nalinginnaasumik akerleriissuteqartoqannginnissaa. Inatsisartut inatsisaat atorfeqarnermut atatillugu isumaqatigiissutaasartut qanoq iluseqarnissaannik eqqussinngilaq. Oqaasiinnartigit suliffeqarnissamik imaluunniit atugassarititaasussanut tunngatillugu isumaqatigiissuteqarneq taamaasilluni atorsinnaajunnaanngilaq.

Imm. 6-imut

Inatsisartut inatsisaat una minnerpaaffissanut inatsisaavoq. Imm. 7 eqqaassanngikkaani Inatsisartut inatsisaat sulineramik inuussutissarsiuteqartumut ajoqusiisumik sanioqqunneqarsinnaanngilaq.

Imm. 7-imut

Naalackersuisut piginnaatinneqarput Inatsisartut inatsisaata atortinneqarfigisaani annikinnerusutigut iluarsiissuteqartarsinnaanermut, taamatullu aqutsinikkut aaqqiissutit nalunaarutikkut pisartussaallutik.

§ 1, imm. 1-imut atatillugu atuuttoqarsinnaavoq pissutsinik sulisitsisup paasissutissiisussaaneermik pisussaaffiata aamma atorfeqartitsinermi aningaasartuutaasut allat akornanni, aamma assersuutigalugu atorfeqarnerup utaqqiisaasumik aaqqissuussaaffigisaani, soorlu aalajangersimasuunngitsumik suliffeqarnerit assigiinngitsut.

Taamaattuni atorfeqarnerup siviussusia aamma annertussusia assersuutigalugu ukiup qanoq ilinera tunngavigalugu aaqqissuussaasimasinnaavoq, pisassanik, tunisoqartarneranik, takornariartaassuit tikinnissaannik il.il. tunngaveqartunik, Naalackersuisullu sulisitsinissanik aalajangersimasunik aaqqissuussisinnaanerini, annikinnerusutiguinnaq imm. 1-imi piumasagaatinik naammassinnittunik, taamalu inatsimmi pineqartunut ilaasussaannngitsunik.

## § 2-mut

### Imm. 1-imut

Aalajangersakkami tassani sulisitsisup paasissutissiisussaataitanera aalajangersarneqarpoq. Piffissaliussamik naatsorsuineri ullut ilivitsut tunngavigineqassapput. Assersuutigalugu suliffeqartoq qaammatip 8-aani aallartissimappat, sulisitsisup sulinermik inuussutissarsiuteqartoq kingusinnerpaamik qaammatip tulliata 8-aani paasissutissanik nassissavaa. Tamatumani ulloq taanna sulinermik inuussutissarsiuteqartup sulinngiffiginera apequtaatinnagu.

Pisussaaffeqarneq pilersarpoq atuullunilu atorfeqarnermut atasuunngitsutut. Pisussaaffik taamaattumik sumiginnarneqarsinnaanngilaq atorfeqarnerup atorunnaarsinneratigut. Matumani aamma innersuussisoqassaaq § 1, imm. 1-imut, naak atorfeqarneq qaammat ataaseq inorlugu sivisussuseqaraluartoq, kisianni sivisunerusussaasimagaluartoq, inatsisip atortinneqarfigisaata iluaniippoq, taamaattumillu sulisitsisoq paasissutissiinnissaminut pisussaaffeqarluni naammassineqartussamik kingusinnerpaamik atorfininnermiit qaammatip qaangiunnerani.

Kalaallit Nunaanni oqaatsit assigiinngitsut arlaqartut atorneqartarput, Kalaallit Nunaannilu pisortatigoortumik kalaallit oqaasii tunngaviupput, eqqartuussiveqarnikkullu Kalaallit Nunaanni kalaallit aamma danskit oqaasii atugaallutik. Tamatumalu saniatigut suliffeqarnermi inuit amerlalaartut danskisut imaluunniit kalaallisut oqaaseqanngillat. Sulinermik inuussutissarsiuteqartup inunnguuseralugit oqaasii pinngitsoorani sulisitsisup aamma oqaaserisannimmagit, qularnaarneqassaaq paasissutissat tunniunneqartut sulinermik inuussutissarsiortumit paasineqarsinnaanissaat.

Avataaniit sulisut ullumikkut atorfeqarneq pillugu, sulinissamut najugaqarallarnissamullu akuersissutinik tigusaqarsinnaaneq sioqqullugu, oqartussanut nassiuussisarneq atoreerpaat.

### Imm. 2-mut

Sulinermik inuussutissarsiuteqartup qinnutigisinnaavaa paasissutissat pissami kalaallisut imaluunniit danskisut oqaatsit atorlugit tunniunneqarnissaat. Sulisitsisorlu tamatuma kingornagut qaammammik periarfissaqartinneqassaaq paasissutissat tunniunneqartussat oqaatsinut pineqartunut nutserlugit suliarineqarnissaannut. Naapertuilluartumik iliorsinnaajumalluni aalajangersarneqarpoq pisussaaffik pineqartoq oqaatsinut sunulluunniit atuuttuunngitsaq, kisianni oqaatsinut kalaallisut danskisullu kisimi tunngasuusoq. Piffissaliineq atorfeqarnerup aallaqqaataaniit atuutinngilaq, kisianni sulinermik inuussutissarsiuteqartup paasissutissanik kalaallisut imaluunniit danskisut piumasaqarneraniit.

### Imm. 3-mut

Tassani nalunaarneqarput paasissutissat suut sulisitsisup sulinermik inuussutissarsiuteqartumut tunniutissallugit pisussaaffiginerai.

Nr. 2-mut tunngatillugu, Sulisitsisup paasissutissani erseqqissassavaa sulinermik inuussutissarsiuteqartoq suliariorluni sumunngartassanersoq, ajornanngippat suliassanik ingerlatsiviusartumut.

Paasissutissiineq suliassat Kalaallit Nunaanni ingerlanneqartartut oqaatigalugu naammassanngilaq, soorlutaaq illoqarfimmi imaluunniit nunaqarfimmi sumi sulisoqassanersoq nalinginnaasumik naammattanngitsoq.

Aalajangersagaq paasineqassaaq nr. 3-mi paasissutissanut atasumik. Bussinik ingerlatitsisartup nalinginnaasumik tunngavigisanngilaa bussit najukkami uninngasarfiat suliffittut. Pineqartorli suli piginnaatitaassaaq suliartorfissaminik paasissutissinneqarnissamik.

Nr. 6-9-mut, paasissutissat taakkua tunniunneqarsinnaapput malittarisassat aalajangersimasut atorfeqarnermi atugassarititaasut, tak. imm. 4, innersuullugit.

Nr. 8-mi oqaaseqatigiit siulliit imaapput: “Akissarsiat atuuttut imaluunniit akissarsiat isumaqatigiissutaasut, sulineramik inuussutissarsiuteqartup pisinnaatitaaffigisai sulinermik aallartitsinermini, aamma tapisiat akissarsianullu ilaasut allat, pineqartuni ilaariinngitsut, assersuutigalugit soraarnerussutisiassanut akiliutit, taamaattoqarpallu nerisaqarneq aamma ineqartitaaneq”, qaangiuttoorluni akissarsiaqartitsineq pillugu paasissutissat pineqarput.

Nr. 10-mut, ersarissagaassaaq isumaqatigiissut suna pineqarnersoq innersuunneqartoq. Assersuutigalugu SIK Sulisitsisunut assigiinngitsunik arlaqartunik isumaqatigiissuteqarpoq. Tamatuma saniatigut isumaqatigiissutit assigiinngitsut suliffeqarfinnut assigiinngitsunut aamma atuupput, pisortani suliffinnut aamma namminersortut suliffiutaannut. Taamaattumik naammannngilaq innersuussissalluni “SIK-p isumaqatigiissutaanut”.

Imm. 4-mut

Pappialaat sulinermik inuussutissarsiuteqartumut tunniunneqartoq pappialaasinnaavoq tigussaasoq imaluunniit elektroniskiusoq. Pappialaat tunniunneqarsimalersarpoq sulinermik inuussutissarsiuteqartumut atorneqarsinnaanngorlugu tunniunneqaraangat. Taamaattumik pappialaat sulisitsisumit taamaallaat atorneqarsinnaasoq, imaluunniit sulisitsisup atortorissaarutai akuersineratigullu aatsaat iluaqutigalugu atorneqarsinnaasoq naammannngilaq. Assersuutigalugu sulinermik inuussutissarsiuteqartup nammineq atuarsinnaanngisaa, assilisinnaanngisaa imaluunniit avissinnaanngisaa naammannngilaq.

Nr. 1-4, pappialaat imatut aaqqissuunneqarsimassaaq paasiuminartuullunilu paasissutissanik ajornanngitsumik aallerfigineqarsinnaalluni.

Nr. 5-imut

Innersuussineq eqqoqqissaassaaq. Assersuutigalugu allakkiaq naammassanngilaq allassimappat “atorfeqarnermi atugassarititaasut atorfilinnut – funktionærinut – inatsit naapertorlugu”.

### *§ 3-mut*

Imm. 1-imut

Paasissutissat aallaavittut tunngaveqareersimassapput paasissutissiinissamut pisussaaffimmik § 2, imm. 3 aamma § 5-imi. Aalajangersakkap kinguneraa sulisitsisup pisussaaffeqarnera paasissutissanik qitiusunik sulinermik inuussutissarsiuteqartumut tunniussisussaannermik, nunani allani suliartortitsinnginnermi.

### *§ 4-mut*

Imm. 1-imut

Aalajangersagaq taanna danskit *atorfinititsisarnermut inatsisaanni* ilaanngilaq. Kalaallit Nunaanni illoqarfiit nunaqarfiillu assigiinngitsut akornanni ungasissorujussuuvoq. Killeqartunik angalanissamut aqqutissaqartarpoq sumiiffiit akornanni, aammalu annertuunik aningaasartuuteqarnissamik kinguneqartarluni nuussagaanni imaluunniit ilaqquttat ilagissagaanni. Eqqaaneqartut tunngavigalugit Kalaallit Nunaanni sumiiffimmut allamut suliatorallarneq nunanut allanut suliatornertulli pisariutigingajassaaq. Taamaattumik sulisitsisoq pisussaaffeqarpoq aamma paasissutissanik tunniussisarnissamut sulinermik inuussutissarsiuteqartunut Kalaallit Nunaata iluani suliatorallartunut.

#### § 5-imut

Atorfeqarnermi atugassarititaasunik allannguinerit suli ingerlaqqittumik kalaallit isumaqatigiissuteqartarnerinut malittarisassaataat naapertorlugit aalajangersagaapput, aamma taakkua allannguutaat naapertorlugit, tak. § 1, imm. 5. Aalajangersakkap kinguneraa paasissutissat allannguutaat §§ 2-4 naapertorlugit aamma sulinermik inuussutissarsiuteqartumut tunniunneqartussaaneri.

Tamatuma kinguneraa *atorfeqarnermut uppernarsaat* atorfinititsinermut isumaqatigiissut naapertorlugu suliaassamat, aamma atorfeqarnermi atugassarititaasut kingusinnerusukkut allannguutaat tunngavigalugit.

#### § 6-imut

Aalajangersarneqarpoq sulinermik inuussutissarsiuteqartoq taartisiassinneqarsinnaasoq eqqartuussivitsigut, Inatsisartut inatsisaat unioqqutinneqarsimappat.

Taartisiassiissutissat annertussusissaasa isumaliutigineqarneranni piareersimaffigineqassaaq suliffeqarnermi illuatungeriit akornanni isumaqatigiissuteqartoqartarnera, Inatsisartut inatsisaanni § 1, imm. 2-mut naapertuuttunik. Taamaattuni amerlasuutigut isumaqatigiissummik unioqqutitsineq misilinneqarsinnaassaaq illuatungeriit isumaqatigiissutaat naapertorlugit akerleriissutit suliarineqartarnerannut aalajangersakkat naapertorlugit, pineqaatissiisullu taamaattuni akerleriissutsit suliarineqartarnerannut eqqartuussivimmi akiliisitaanermik kinguneqarsinnaalluni.

Taartisiassat annertussusissaat inatsimmik unioqqutitsinerup kingunerisaanik akiliutigineqartussat taamaattumik annertussusilerneqartariaqarput isiginiarlugit sanilliunneqarsinnaasut aalajangiisarsimanerit sulisartoqarnermi akerleriissutaasut suliarineqartarnerannut eqqartuussivimmi. Akerleriissutaasut suliarineqartarnerannut eqqartuussivimmi suliaasartut aalajangiisarnerillu annertussutsini assigiinngitsuni pisarput, taamaattumillu pineqaatissiisarnerit assigiinngitsunik annertussuseqarsinnaasartut pineqarlutik.

Kalaallit Nunanni suliffeqarnermik ingerlatsiviusuni sulisut ilaat amerlasuut Danmarkimiit aggersuusarput, soorluttaaq eqqartuussivitsigut aamma inatsisitigut amerlasuuni kalaallit aamma danskit aqqissuussineri assigiissuseqartartut. Tamanna tunngavigalugu pissusissamisussaap inatsisitigut aalajangiisarnerni tunngavigineqartut taartisisitsisarnernut aallaavittut danskit aqqissuussinerinut ungasissuunngikkunik.



Aalajangersagaq naapertorlugu ajunngitsorsiassaq akileraaruserneqanngilaq, ajunngitsorsiassaq eqqartuussivitsigut tunniunneqarsimagaluarpalluunniit imaluunniit pineqartoq isumaqatigiissuteqarnikkut naammassineqarsimagaluarpat.

#### *§ 7-imut*

##### *Imm. 1-imut*

§ 7-imi siunnersuutigineqarpoq Inatsisartut inatsisaat atortuulersinneqassasoq Naalakkersuisut nalunaarusiorneratigut.

Sulisitsisut eqqarsaatigalugit Inatsisartut inatsisaat atortuulersinneqarnissaa sivikinnerpaamik qaammatit arfinillit sioqqullugu nalunaarut tamanut saqqummiuttariaqarpoq.

##### *Imm. 2-mut*

Inatsisartut inatsisaata nalunaarutikkut atortuulerneratigut, atorfinitsitsinermi isumaqatigiissutit eqqarsaatigalugit, Inatsisartut inatsisaat atuutilerfianiit kingornalu atsiorneqartunut atuutissaaq.

Atuutilerfia sioqqullugu atorfinitsitsinernut ikaarsaarnermi immikkut aalajangersakkat siunnersuummi § 8-mi atuutissapput.

#### *§ 8-mut*

##### *Imm. 1-imut*

Aalajangersagaq imaqarpoq piffissamut ikaarsaarfiusumut sulinermik inuussutissarsiteqartunut inatsisartut inatsisaata atuutilerfia sioqqullugu atorfeqarnermut atatillugu isumaqatigiissuteqarsimasunut malittarisassamik, atorfeqarnerlu Inatsisartut inatsisaata atuutilerfiata kingornagut atuuppat atortuusussamik. Inatsisartut inatsisaata atuutilerfianut piffissaq § 7-mi aalajangersarneqartutut Naalakkersuisut nalunaarummik akuersissuteqarneratigut pissaq.

Kalaallit Nunaanni nutaamik inatsisiliornermut tunngatillugu sulisitsisullu inatsimmik nutaamik paasinninnissaannut piffissaqartitsiumalluni, sulisitsisut § 8, imm. 1 naapertorlugu piumasaaqateqartoqarneratigut qaammatinik 2-nik piffissaqarput inatsisip atuutilerneraniit qaammatini 6-inik siullerni.

Suliartorlutik aallartitaasimasunut §§-it 3 aamma 4 naapertorlugit Inatsisartut inatsisaata atuutilerfiata kingornagut, taamaattoq sulisitsisoq paasissutissiinissamut pisussaaffeqassaaq.

##### *Imm. 2-mut*

Inatsisartut inatsisaata atuutilerneraniit sulisitsisut qaammatinik arfinilinnik sulisunut inatsisip atuutilinnginnerani atorfinitsinneqartut paasissutissiinissamut pisussaaffiup naammassinissaannut piffissalernerqarput. Piffissaliineq taanna aalajangersarneqarpoq Inatsisartut inatsisaata naammaginantumik Kalaallit Nunaanni atortuulersinneqarnissaa siunertaralugu.

Imm. 2-p siunertaraa sulisitsisut Inatsisartut inatsisaata atortuulerneraniit tunineqarnissaat piffissamik qaammatinik 6-inik sivilisussuseqartumik, sulinermik inuussutissarsiteqartut sulisooreersut paasissutissanik § 2, imm. 3, nr. 1-10-mi pineqartunik sulinermullu

inuussutissarsiuteqartumut  
tunniussaqaarnissaannut.

allaganngorlugit

tunniunneqareersimannngitsunik

Suliartorlutik aallartitaasimasunut §§-it 3 aamma 4 naapertorlugit Inatsisartut inatsisaata atuutilersinneqarnerata kingornagut, taamaattoq sulisitsisoq paasissutissiinissamut pisussaaffeqassaaq.

Piffissami ikaarsaarfiusumi Inatsisartut inatsisaata atuutilersinneqarneraniit tamatumu kingorna qaammatit arfinillit tungaanut taamaasilluni sulisitsisoq pisussaaffeqanngilaq sulinermik inuussutissarsiuteqartumut paasissutissanik tunniussisussaanermut inatsisip atuutilerana sioqqullugu atorfeqareersunut. Taamaattoq sulinermik inuussutissarsiuteqartoq paasissutissanik piniarsinnaavoq, piniarnermiit qaammatit 2-t qaangiutsinnagit tunniunneqartussanik, tak. imm. 1.

**Tusarniaanermut allakkiaq Sulisitsisup sulinermik inuussutissarsiuteqartumik atorfeqarnermi atugassarititaasut pillugit ilisimatitsisussaananut Inatsisartut inatsisaat pillugu**

Siunnersuut tusarniaassutigineqarsimavoq, soorluttaaq Naalakkersuisut tusarniaasarnermut nittartagaanni [www.naalakkersuisut.gl](http://www.naalakkersuisut.gl) piffissami 12. november 2021 - 10. december 2021 saqumitinneqartoq.

Piffissami tassani aamma toqqaannartumik tusarniaassutigineqarluni nassiunneqarluni tusarniaavigineqartunut tulliuuttunut:

NUSUKA (Nunaqavissut Suliffiutillit Kattuffiat), Grønlands Erhverv, SIK (Sulinermik Inuussutissarsiuteqartut Kattuffiat), AK (Atorfillit Kattuffiat), ASG (Ilinniagartuut Kalaallit Nunaanni Kattuffiat - Akademikernes Sammenslutning i Grønland), Royal Greenland, IMAK (Ilinniartitsisut Meeqqat Atuarfianneersut Kattuffiat) aamma kalaallit kommuniinut.

**Tusarniaanermi akissutit tiguneqartut**

Tusarniaanermut atatillugu akissutinik tigusaqartoqarpoq tulliuuttuniit: SIK (Sulinermik Inuussutissarsiuteqartut Kattuffiat), AK (Atorfillit Kattuffiat), Sulisitsisut, Kommune Kujalleq, Qeqqata Kommunia, IMAK (Ilinniartitsisut Meeqqat Atuarfianneersut Kattuffiat), Aatsitassanut Inatsisinillu Atortitsinermut Naalakkersuisoqarfik, Meeqqanut, Inuusuttunut Ilaqutariinnullu Naalakkersuisoqarfik, Nunalerinermut, Imminut Pilersornermut, Nukissiuuteqarnermut Avatangiisunullu Naalakkersuisoqarfik.

IMAK (Ilinniartitsisut Meeqqat Atuarfianneersut Kattuffiat), Nunalerinermut, Imminut Pilersornermut Avatangiisunullu Naalakkersuisoqarfik aamma Aatsitassanut Naalakkersuisoqarfik, Meeqqanut, Inuusuttunut Ilaqutariinnullu Naalakkersuisoqarfik aamma Inatsisinik Atortitsinermut Naalakkersuisoqarfik tamarmik oqaaseqaateqassanatik nalunaaruteqarput.

Ulloq 6. januar 2022 aamma tiguneqarpoq Kommuneqarfik Sermersuumiit tusarniaanermi akissut. Kommuneqarfik Sermersuumiit tusarniaanermut akissut tamatumunngalu oqaaseqaatit tusarniaanermut atatillugu allakkiami ilaapput, tusarniaanermi akissutaasutulli allatut.

Kiisalu 19. september 2022 Royal Arctic Line-imiit (RAL) tusarniaanermi akissummik tigusaqartoqarpoq. RAL-ip oqaatigaa siunnersuut iluarisimaarlugu, kiisalu isumaqatigalugu inatsisissatut siunnersuummut nassuiaatitut oqaaseqaatini imm. 4-mut atatillugu allassimasoq, siunnersuutip inuussutissarsiortunut aningaasaqarnikkut aamma allaffissornikkut kingunerisassai eqqarsaatigalugit.

Tusarniaanermi akissutaasut Naalakkersuisut tusarniaanermut nittartagaanni siunnersuutip ataani nassaassaapput.

**Aallarniut**

Ataani tusarniaanermi akissutaasut sammeneqarput

Tusarniaanermut atatillugu akissutaasut issuarneqartarput tamakkiisumik, taamaattorli tusarniaanermut tunngassuteqannginnerusortaataat peerneqartarlutik.

Isumaginninnermut, Suliffeqarnermut Nunamullu Namminermut Naalakkersuisoqarfiup oqaaseqaatai kipungasumik allallugit nalunaarneqartarput.

### **Tusarniaarnermi akissut**

**1. SIK-miit tusarniaanermi akissut (Sulineramik Inuussutissarsiuteqartut Kattufiat):**

”SIK-ip nassiunneqartumut Sulisitsisup sulineramik inuussutissarsiuteqartumik atorfeqarnermi atugassarititaasut pillugit ilisimatitsisussaananeranut Inatsisartut inatsisissaattut siunnersuummut oqaaseqarnissamut periarfissaqartinneqarnertik qujassutigaa.

SIK ilalersinnaavaa inatsisip siunertarisaa, taamalu pisussaaffiulissasoq sulisitsisup allaganngorlugu atorfeqarneq pillugu sulineramik inuussutissarsiuteqartumut nalunaaruteqartalernissaa. Ullumikkut SIK-p amerlasuutigut misigisarpaa, minnerunngitsumik namminersortut suliffeqarfiisa akornanni, sulineramik inuussutissarsiuteqartut allaganngorlugit uppersaatinik tunineqartannginneri, qanoq ittunik atorfeqarnermi atugassarititaasunik atuuttoqarnerisooq pillugu, pissutsillu taamaanneri amerlasuutigut piginnaatitaaffinnut aamma pisussaaffinnut atatillugu nalornissuteqarnernik pilersitsisarlutik, pisariaqanngitsunillu illuatungeriit akornanni saqitsaannernik pilersitsisarlutik. Atorfeqarneq pillugu Kalaallit Nunaanni inatsimmik atortuulersitsineq taamaasilluni peqataassaaq suliffeqarnermut atatillugu suliasaqaarfimmi aaqjissuussaananerisumik atugassaqaartitsilernissamut.

SIK-p maluginiarpaa inatsisissamut siunnersuutip annertunerisutigut danskit atorfeqarnermut inatsisaata assigigaa, tamannalu ataatsimut isigaluni silatusaannerisinnaasoq, taamaakkaluatorli SIK ataani takuneqarsinnaasutut ataasiakkaanik allannguutissatut siunnersuuteqarpoq, allannguutissatut siunnersuutit pilersitsisussat allaanerussutaasunik danskit aalajangersagaannut sanilliullugit.

Aalajangersakkanut ataasiakkaanut oqaaseqaatit:

#### **§ 1, imm. 3-mut:**

Siunnersuummi ersippoq inatsit atortinneqassanngitsoq inunnut imarsiornermik inatsimmi aalajangersakkanut ilaareersunut. SIK maluginiarpaa aalajangersakkap assinga danskit atorfeqarnermut inatsisaanni allassimasooq, kisianni suna pissutaava inunnut imarsiornermik inatsimmi ilaasunut inatsisissap matuma atortinneqannginnissaanut?

Siunnersuummut oqaaseqaatini siunnersuutip § 1, imm. 3-a pillugu allassimasooqanngilaq. Naalakkersuisoqarfiup kissaatigippagu inatsimmut ilaannginnermik aalajangersakkap pineqartup matumani aalajangiusimaneqarnissaa, kaammattuutigissavarput inatsisissamut oqaaseqaatini ersarinnerisumik allaaserineqassasoq sooq inuit taakkua inatsimmi aalajangersakkanut ilaannginnissaat.”

*Isumaginninnermut, Suliffeqarnermut Nunamullu Namminermut Naalakkersuisoqarfiup akissutaa.*

*Oqaatigineqassaaq ullumikkut malittarisassaqaareermat inuttaqarnermut atatillugu skemanut atatillugu, aamma imarsiortut inuttaasarnerannut uppersaatinut tunngatillugu.*

*Naalackersuisut nalilerpaat imarsiornermik inuussutissarsiortut atorfeqarnerinut atugassarititaasut immikkut tamatumunnga inatsisitigut aqunneqareersut, maannamut aaqqissuussinerit iluanni. Ilanngullugulu oqaatigineqarsinnaavoq oqaloqatigiinnernik ingerlatsisoqarmat Naalackersuisut aamma Naalagaaffeqatigiinnermi oqartussat akornanni, imarsiornermi inuussutissarsiuteqartunut atatillugu piareersaasiortoqarluni Kunngip peqqussutissaanik Kalaallit Nunaanni atortuulersitsinissamik, imarsiornermik inuussutissarsiuteqartut atorfeqarnerannut atatillugu. Tamanna tunuliaqutaavoq § 1, imm. 3-mi aalajangersarneqarmat atorfeqarnermut ilisimatitsisussaannermik inatsit inunnut imarsiortunut atortinneqassanngitsoq.*

*Inatsisartut inatsisaat suliarineqanngilaq imarsiortunut atugassarititaasut sunniuteqarfiginissaannik siunnerfeqartumik. Imarsiortunut malittarisassanik allannguisinnaaneq immikkut piareersaateqaqqaarluni suliassaavoq, inuussutissarsiortullu pineqartut peqataatinneqarnissaat pisariaqassalluni.*

*Tusarniaanermut akissutaasut tunuliaqutaralugit inatsisissamut siunnersuummut oqaaseqaatini § 1-imut tunngatillugu allannguisoqarpoq. § 1, imm. 3-llu oqaasertai erseqqissarneqarlutittaaq.*

## **”§ 2, imm. 1 aamma oqaaseqatigiit aappaat**

§ 2, imm. 1-mi ersippoq sulisitsisup kingusinnerpaamik atorfeqarnerup aallartinneraniit qaammatip qaangiunnerani sulinermik inuussutissarsiuteqartoq paasissutissittussaagaa siunnersuummi § 2, imm. 3, nr. 1-10-imi pineqartunut atatillugu, ilisimatitsisutigineqartullu tunniunneqartussaasut oqaatsit sulinermik inuussutissarsiuteqartup paasisinnaasai atorlugit. Imm. 2-mi ersippoq sulinermik inuussutissarsiuteqartup qinnutigippagu paasissutissat kalaallisut imaluunniit danskisut tunniunneqassasut, sulisitsisup kingusinnerpaamik qaammatip ataatsip qaangiunnerani sulinermik inuussutissarsiuteqartumut paasissutissat oqaatsit kissaatigineqartut atorlugit tunniuttussaagai. Tunngaviusumik taamaasilluni qaammatit marluk ingerlasinnaapput sulinermik inuussutissarsiuteqartup inunnguuseralugit oqaasii atorlugit atorfeqarnermi isumaqatigiisummik tigusaqarnissaanut.

SIK-p nalilerpaa § 2, imm. 1 aamma 2 iluaqusiisumik allaqqinneqarsinnaasoq pissutsit avatangiisitsinni atuuttut perrannerulersikkumallugit. Tamatumani pissusissamisuussaaq nutaamik oqaasertaliinissaq: ‘Sulisitsisup kingusinnerpaamik atorfeqarnerup aallartinneraniit qaammatip ataatsip qaangiunnerani sulinermik inuussutissarsiuteqartoq paasissutissanik tunissavaa pissutsinut imm. 3, nr. 1-10-mi pineqartunut atatillugu. Sulisitsisoq pisussaaffeqarpoq paasissutissanik tunniussinissamut kalaallisut, danskisut imaluunniit tuluttut, sulinermik inuussutissarsiuteqartup qanoq kissaateqarnera allaavigalugu’.

Siunnersuut siulianiittoq pisariinnerullunilu suliassaqarfimmik pitsaanerusumik aqutsinermik pilersitsissaaq, qularnaassallugulu sulinermik inuussutissarsiuteqartup siullertut oqaatsit kissaatigisani atorlugit paasissutissinneqarnissaanik.”

*Isumaginninnermut, Suliffeqarnermut Nunamullu Namminermit Naalackersuisoqarfiup akissutaa.*

*Siunnersuut malinneqanngilaq.*

*Nalilernerqarpoq maannamut siunnersuutaasoq § 2, imm. 1 pissusissamisoortuusoq, pissutigalugu imm. 1-imi ersarissumik ersimmat sulisitsisup paasissutissat sulineramik inuussutissarsiuteqartup oqaatsit paasisinnaasai atorlugit tunniuttussaagai.*

*Tusarniaavigineqartumit oqaasertaliussassatut siunnersuutigineqartoq pissusissamisuunnginnerusutut isigineqarpoq, killiliissammat sulisitsisup aamma sulineramik inuussutissarsiuteqartup kiffaangissuseqarneranik atorfeqarnermi atugassarititaasunik qanoq ittunik toqqaanissamik, soorluttaaq assersuutigalugu sulineramik inuussutissarsiuteqartoq atorfeqarnerup ingerlareernerani paasissutissanik danskisut imaluunniit kalaallisut atorfissaqartitsilersinnaasoq qularnaarunneqartoq periarfissamik maanna imm. 2-mi.*

*§ 2, imm. 2 naapertorlugu sulineramik inuussutissarsiuteqartup paasissutissat danskisut imaluunniit kalaallisut piumasarisinnaavai.*

**”§ 2, imm. 3-mut:**

SIK-p immikkoortuni 1-10-mi pineqartut naammaginartumik imaqartutut nalilerpai, sulisitsisup paasissutissiinissamik pisussaaffeqarneranut atatillugu. Taamaattoq SIK-p siunnersuutiginiarpaa qaangiuttoornersiaqarnermut atugassarititaasunik aqutsineq imm. 3-mi ilanngunneqassasoq. Tamatumani isiginiarlugu SIK-p amerlasuutigut misigisarmagu atorfeqartitsinermit atugassarititaasuni ersarissunik aalajangersagaqartanngitsoq qaangiuttoornersiat suusinnaaneri, suliffiusussap nalinginnaasup avataani suligaanni.”

*Isumaginninnermut, Suliffeqarnermut Nunamullu Namminermut Naalakkersuisoqarfiup akissutaa.*

*Inatsimmut oqaaseqaatini § 2-mi oqaaseqatigiinnut siullernut imm. 3-mi, nr. 8-mi allassimavoq: “Akissarsiat atuuttut imaluunniit isumaqatigiissutaasut sulineramik inuussutissarsiuteqartup pisinnaatitaaffigisai atorfeqarnerup aallartinnerani, aamma tapisiat akissarsianullu ilaasussat allat, tassani ilaangitsut, assersuutigalugu pensioneqarnermut akiliutissat aamma taamaattoqarpat nerisaqarnek aamma najugaqarnek”, ilaapput qaangiuttoornersianut paasissutissani.*

**”§ 2, imm. 4-mut:**

SIK ilisimavaa periarfissat nalunaarsorneqartut imm. 4, nr. 1-4-miittut inatsit naapertorlugu paasissutissiinissamut pisussaaffiit danskit malittarisassaasa assigigaat, kisiannili SIK-p siunnersuutiginiarpaa § 2, imm. 4, nutaamik oqaasertalerneqassasoq, avatangiisini piviusuni atorsinnaanerulersillugu. Tamatumunngalu atatillugu aamma oqartoqarsinnaavoq “keep it simple”.

SIK qularinngilaa paatsiveerusimaarnermik annertuvallaamik assigiinngitsuliornermik kinguneqassasoq – pissutsillu pisariunerulersinneqarlutik – sulisitsisup periarfissat 4-at periarfissarisappagit, inatsimmik eqqortitsiniarnermi, taamalu aamma pappialaatinik assigiinngitsunik kaaviiartoqarsinnaalluni, ataatsimut sulineramik inuussutissarsiuteqartumut qanoq ittunik atugassaqartitsisoqarneranik takutitsisussanik. Taamaattumik pitsaaneruvoq sulisitsisumut piunasaqartoqarnissaa atorfeqarnermut allakkiortoqartarnissaa imaluunniit atorfeqarnermut isumaqatigiissuortoqartarnissaa uppersaataasumik (atorfeqarnermut allakkat aamma atorfeqarnermut isumaqatigiissut tunngaviatigut assigiipput, kisianni assigiinngisitaalaartumik atortinneqartarunarlutik, sulisitsisuni assigiinngitsuni).

SIK-p siulianiittut innersuullugit imaattumik § 2, imm. 4-mi oqaasertaliinissamik siunnersuuteqassaaq: “Paasissutissiisussaataaneq naammassineqartassaaq allaganngorlugu atorfeqarnermut allakkiornikkut imaluunniit isumaqatigiissusiornikkut”. Taava inatsimmut oqaaseqaatini allaaserineqarsinnaavoq ersarinnerusumik atorfeqarnermut allagarsiat imaluunniit isumaqatigiissut qanoq paasineqassanersoq.”

*Isumaginninnermut, Suliffeqarnermut Nunamullu Namminermut Naalackersuisoqarfiup akissutaa.*

*Sulisitsisoq aamma sulinermik inuussutissarsiuteqartoq eqaannerpaanik periarfissaqartikkumallugu § 2, imm. 4-mi allannqortitsisoqannqilaq.*

**”§ 5-imut:**

SIK-p eqqarsarnartoqartippaa atorfeqarnek pillugu allagarsiassat allaganngorlugit aatsaat sulinermik inuussutissarsiuteqartumut tunniunneqartarnissaat allannqinerup kingorna qaammat qaangiukkaangat. Taamaattumillu SIK-p Naalackersuisoqarfik kaammattorumavaa isumaliutigeqqullugu piunasaqaataassanersoq allannqutit pineqartut taamaallaat atortuulertarnissaat allannqutit allaganngorlugit sulinermik inuussutissarsiuteqartumut nalunaarutigineqareeraangata.

SIK-p ilanngullugu Naalackersuisoqarfimmut kaammattuutigiumavaa isumaliutigineqassasoq qanoq allannqut pineqartoq sulinermik inuussutissarsiuteqartumut nalunaarutigineqartassanersoq. Tassani eqqarsaatigineqarpoq atorfeqarnermut isumaqatigiissummik nutaamik suliaqartoqassanersoq, imaluunniit piunasaqaataaginnassanersoq atorfeqarnermut isumaqatigiissut ilassuserneqassasoq.”

*Isumaginninnermut, Suliffeqarnermut Nunamullu Namminermut Naalackersuisoqarfiup akissutaa.*

*§ 5 aqutsisuunngilaq qanoq aamma qaqugu isumaqatigiissuteqarnikkut atugassarititaasut allannqutaasa atortuulertarnerinut. Aqutsinerit taamaattut Inatsisartut inatsisaata matuma siunertaasa aamma avataaniipput.*

*§ 5 sulisitsisumik taamaallaat pisussaaffiliivoq paasissutissiinissamut pisussaaffeqarnermik, taamalu sulinermik inuussutissarsiuteqartup atorfeqarnermi atugassarititaasut allannqutaanik paasisinneqartarnissaanik, imatut aaqqissuussaasumik sulinermik inuussutissarsiuteqartup paasissutissanik tunineqartussaananik atorfeqarnermi atugassarititaasut pillugit, Inatsisartut inatsisaat naapertorlugu.*

**”§ 6-imut:**

Aalajangersagaq taanna aalajangiivoq qanoq ittunik kinguneqartitsisoqartussaananik paasissutissiisusaanermik pisussaaffiup eqqortinneqannqinnerani. Tassani ersippoq sulinermik inuussutissarsiuteqartoq paasissutissinneqarnissamik pisussaaffiup naammassineqannqinnerani ajunngitsorsiaqartinneqarsinnaasoq sap. ak. 13-it angullugit akissarsiaqartitsinikkut, pisuni annertunerusuni qaffanneqarsinnaasunik sap. ak. 20-it angullugit. Kisianni aamma aalajangersakkami ersippoq ajunngitsorsiassat pineqartut qaffasinnerpaamik 1.000 kr.-inik annertussuseqartinneqarsinnaasut, paasissutissiinissamik amigaataasut utoqqatserneqarsinnaammata, atorfeqarnermilu pissutsinut sunniuteqannqippata.

Tamatumunnga atatillugu SIK aperisariaqarpoq qanoq isumaqartinneqarnersut “utoqqatsissutigineqarsinnaasunik amigaatit”, “atorfeqarnermullu sunniteqanngitsut.” Pissusissamisussaaq tamatuma ersarinnerusunik allaaserineqarnissaa inatsisissamut oqaaseqaatini, Naalackersuisoqarfiup inatsimmi oqaasertat taamatut isikkoqartiinnarniarpagit.”

*Isumaginninnermut, Suliffeqarnermut Nunamullu Namminermut Naalackersuisoqarfiup akissutaa.*

*§ 6, imm. 1, oqaaseqatigiit sisamaat imaapput: ”Taarsiissutisialli taamaattoq qaffasinnerpaamik 1.000 kr.-inik annertussuseqarsinnaapput, paasissutissiisimanninnee utoqqatsissutigineqarsinnaasunik pissuteqarpat, atorfeqarnermilu atugassarititaasunut tigussaasunik isumaqarsimangippat.”*

*Qaffasinnerpaamik taarsiissutisiassat 1.000 kr.-it naleqquttuupput nalinginnaasunik amigaateqarfiusuni, assersuutigalugu suliffeqarfiup ingerlatsivigisani sumiiffik allamik taarserpagu, taamalu adresse allannngortillugu, kisiannili nalinginnaasunik ulapputeqarnermik pissuteqartumik atorfeqarnermut uppersaammi najukkap allasimaffianik allannguinani, sulinermillu inuussutissarsiuteqartup sukkulluunniit nalornissutigisimangippagu sulisitsisup adressia imaluunniit suliffiup sumiiffia.*

*Assersuummi amigaataasut eqqaaneqaraluarpummi, kisiannili tamanna pingaaruteqarani sulinermik inuussutissarsiuteqartup sukkulluunniit nalornisiginngimmagu suliffiup sumiiffia. Sulinermik inuussutissarsiuteqartoq nuunnerup kingorna najugaqarfimmut adressimut pineqartumut takkuttarpoq. Taamaattumillu pisuni taamaattuni “pineqaatissiissut” takussutissaannaasariaqarpoq pingaaruteqanngitsoq.*

## **”§ 8-mut:**

Naalackersuisoqarfik kaammattorneqarpoq sanilliusseqqullugu aammaarlunilu nalilersueqqullugu § 8, imm. 1 aamma 2-mik aamma siunnersuummut oqaaseqaatinik, isumaqartoqarmat naapertuutinngitsunik siunnersuummi oqaasertaliussani aamma siunnersuummut oqaaseqaatini allasimasoqartoq.”

*Isumaginninnermut, Suliffeqarnermut Nunamullu Namminermut Naalackersuisoqarfiup akissutaa.*

*§ 8, imm. 2-p oqaasertai ersarinnerulersinneqarput. Inatsimmut oqaaseqaatit iluarsivigineqarput.*

## **2. Tusarniaanermut akissutit Atorfillit Kattuffiannit**

”Atorfillit Kattuffianniit (matuma kingorna; AK) tusarniaanermut atatillugu allakkiq siullertut uppersaataavoq inatsisissamut siunnersuutip tiguneqarsimaneramik annerusutigullu tusaatissatut tiguneqarnermik, qularnaariniarnermillu sulinermik inuussutissarsiuteqartut paasissutissinneqartarnissamik uppersaatinillu pinissamik pinnaatitaaffeqarnerannik, taamaattumillu ilalersuisuulluni inatsisissatut siunnersuutip siunertarisaanik, taamaattorli imaattunik oqaaseqaateqarfigineqartunik;

AK-p maluginiarpaa siullertut inatsisissatut siunnersuummi nalunaarneqartoq inatsit atortinneqartanngimmat tamakkiisumik, sulisitsisup pisussaaffeqarfigisaani sulinermik inuussutissarsiuteqartumut paasissutissiisarnissamik atorfeqarnermi atugassarititaasuni,



ataatsimut atuuttumik isumaqatigiissuteqarfiusuni. AK-p apeqquuserpaa tamatuma oqaasertalerneqarnera, apeqqutigiumallugulu siunertaanersaq suliffeqarfiit isumaqatigiissuteqarfiusut inatsisissatut siunnersuummi pineqanngitsut.”

*Isumaginninnermut, Suliffeqarnermut Nunamullu Namminermut Naalakkersuisoqarfiup akissutaa.*

*§ 1, imm. 2-mi erseqqissaasoqarpoq allassimallunilu isumaqatigiissuteqarnikkut pisussaaffeqarfiusuni sulisitsisup paasissutissiisarnissaanik inatsimmi nalunaarneqartutulli inatsit nammineq atortinneqartassanngitsaq.*

*Taamaasilluni Inatsisartut inatsisaat minnerpaaffissatut inatsisaavoq.*

”AK isumaqarpoq ersernerluppallaartoq tigussaanngippallaartorlu nalunaaginnassallugu inatsimmik atortitsinnginneq pisartoq sulinermik inuussutissarsiuteqartup atorfeqarnerminut atatillugu paasissutissanik atorfeqarnermut tunineqartarneratigut, nalunaarnagu paasissutissat suut tunniunneqartussaani. Taamaattumillu AK-p inassutigaa ilanngussisoqassasoq piumasqaammik, taamaallaat sanioqqutsisoqarsinnaasoq ataatsimoorussanik isumaqatigiissutit malittarisassanik imaqaraangata, minnerpaamik inatsimmi aalajangersakkatulli, taamaaliornikkullu assigiinngisitsisoqalissanani isumaqatigiissuteqarfiusunik aamma isumaqatigiissuteqarfiunngitsunik suliffeqarfinnik. AK taamaattoq isumaqarpoq sulisitsisup kattuffiata kiisalu sulinermik inuussutissarsiuteqartup kattuffiata isumaqatigiissutigisinnaassagaat paasissutissiinissamut piumasqaatit annertuut sulinermik inuussutissarsiuteqartumut tunniunneqartussat eqqarsaatigalugit, kiisalu qaqugukkut paasissutissanik inatsimmi nalunaarneqanngitsunik tunniussisoqartassanersaq.”

*Isumaginninnermut, Suliffeqarnermut Nunamullu Namminermut Naalakkersuisoqarfiup akissutaa.*

*Oqaatigineqartoq malinneqarpoq. § 1, imm. 2 ersarissaavigineqarpoq. Takuuk siuliani akissutigineqartut.*

”AK-p oqaatigaa aammalu naammaginanginnerarlugu inatsisissamut siunnersuummi inuit imarsiornermik inatsimmi ilaasut matumani ilaatinneqannginneri. Matumanilu aamma AK-p apersuuserpaa imarsiornermi inatsisit suut pineqarnerisut innersuunneqartut, tamanna inatsisissamut siunnersuummi namminermi oqaaseqaatiniluunniit innersuunneqanngimmat. Piffissami matumani imarsiortunut inatsiseqanngilaq, eqqaassanngikkaanni Inatsisartut inatsisaat 1986-imeersoq umiartortut isumaqatigiissusioqatigineqartarnerannut, sulisitsisunik pisussaaffiliisoq ilisimatitsisarnermik / imaluunniit uppersarsaasiisarnermik umiartortut atorfeqarneranni atugassarititaasunut atatillugu, taamaattumillu AK-p kissaatiginartikkaluarpaa umiartortunut inatsisitigut atugassarititaasut suliamik ilinniarsimasutullu allatut pitsanngorsarneqarnissaat. AK ersarissumik isumaqarpoq Kalaallit Nunaat kinguaattooqqasoq - nunat tamalaat akornanni isumaqatigiissutit kiisalu inatsisiliat eqqarsaatigalugit - imarsiortortatsinnik illersuissutaasut eqqarsaatigalugit, taamaasillunilu inatsisissamut siunnersuut suliamik ilinniagallit akornanni assigiinngisitsinermik annertuumik pilersitsilluni. Imarsiortut inatsisitigut illersugaanerat ilaatinneqassanngippat inatsisiliornermi matumani taava AK-p kaammattuutigiumavaa nunat tamalaat akornanni minnerpaaffissanik aaqquissuussinernut atatillugu suliat perrassarneqarnissaat, kalaallit imarsiortut atorfeqarneranni atugassarititaasut eqqarsaatigalugit.”

*Isumaginninnermut, Suliffeqarnermut Nunamullu Namminermut Naalackersuisoqarfiup akissutaa.*

*SIK-mit oqaaseqaatinut allanut akissutit allat assigisaannik akissuteqartoqarpoq.*

*Oqaatigineqassaaq ullumikkut inuttalersuisarnermut skema aamma inuttaanermut uppersarsaat imarsiortunut atortooreermata.*

*Naalackersuisut nalilerpaat imarsiortunut atorfeqarnermi atugassarititaasut immikkut inatsisiliornerit aqqutigalugit aqunneqartariaqartut, taamalu maannamut aqqissuussinerit malinneqassasut. Ilanngullugu oqaatigineqassaaq Naalackersuisut aamma naalagaaffeqatigiinnermi oqartussat akornanni oqaloqatigiittoqarmat, piareersarumallugu Kunnqip peqqussutaanik Kalaallit Nunaannut atortuulersitsinissaq, imarsiortut atorfeqarnerini atugassarititaasut eqqarsaatigalugit. Tamanna tunuliaqutaavoq § 1, imm. 3-mi aalajangersarneqarmat atorfeqarnermi atugassarititaasunut imarsiortunut atortinneqanninnissaat.*

*Inatsisartut inatsisaat suliaannigilaq imarsiortunut immikkut atortinneqartussanik sunniuteqartussatut. Imarsiortunut malittarisassat nalilernerqarpoq immikkut piareersaateqaqqaarluni allannguinnissamik pisariaqartitsiviussasut, soorluttaaq tassani inuussutissarsortut akulerunneqarsimanissaat naatsorsuutigineqassasoq.*

*Tusarniaanermi akissutigineqartoq tunuliaqutaralugu maanna inatsimmut oqaaseqaatini § 1-imut atatillugu allannguisoqarpoq. Kiisalu aamma § 1, imm. 3-p oqaasertaa erseqqissarneqarluni.*

”AK-p appaatut aamma oqaatigaa sulisitsisut qaammammik piffissaqartut inatsit naapertorlugu pisussaaffimminnik naammassinninnissanut. AK-p ilisimatitsissutigaa isumaliornartuusoq atorfeqartup qaammammi tassani nalorninartumik inissisimasarnissaa. Taamaakkaluartoq AK-p neriuutigaa piffissaliineq taanna sulisitsisut pissusilersortarnerannik allanngortitsiumaartoq, tamatumani aamma pisortani sulisitsisunik, piffissami matumani atorfinitsitsisartunut oqaasiinnartigut akissarsiaasanut atugassarititaasussanullu neriorsuuteqartartunut, sulinermik inuussutissarsiuuteqartup pissarsiarisinnaanngisaanik allaganngorlugit, atorfeqarnermi uppersarsaammik tunniussisoqartinnagu, amerlasuutigut piffissap misilitsiffiusup qaangiutereernerani aatsaat tunniunneqartartukkut. Tamatuma kingunerisarpaa sulinermik inuussutissarsiuuteqartoq atorfimmi aallartittarmat neriuuteqarluni akissarsiaasanik atugassarititaasunillu oqaasiinnartigut tunniunneqarsimasunik, tamatumalu kingornagut suliffeqarfimmi sulisunik sullissinermik suliaqartut atorfeqarnermut uppersarsaasiortarlutik oqaasiinnartigut sulisumut neriorsuutaasimasunut naapertuutinngitsumik, tamannalu akerleriissutaasunik amerlanerusunik pilersitsisarluni, sulisuusup kattuffiata kiisalu sulisitsisup akornanni.”

*Isumaginninnermut, Suliffeqarnermut Nunamullu Namminermut Naalackersuisoqarfiup akissutaa.*

*§ 2, imm. 1, oqaaseqatigiit siulliit qaammammik ataatsimik piffissaliineq aalajangersagaavoq sulisitsisoq aamma sulinermik inuussutissarsiuuteqartoq eqaatsumik periarfissaqartikkumallugit. Inatsisartut inatsisaat akornutissaqartitsinnigilaq pisussaaffiit qaammatip suli ingerlariinninnerani naammassineqartarnissaannut, soorluttaaq*

*isumaqatigiissutitsigut isumaqatigiissuteqartoqarsinnaasoq piffissaliinernik naannerusunik, isumaqatigiissuteqartut tamanna kissaatigippassuk.*

”Naggasiullugu tikkuarneqarpoq ajunngitsorsiassat annertussusissaat. Tikkuarneqarpoq inatsisissamut siunnersuut maanna iluserisaasoq tunngavigalugu taamaallaat suliffeqarfinni isumaqatigiissuteqarfiunngitsuni sulisunut sunniuteqassasoq, inatsit sanioqqunneqarsinnaammat sulineramik inuussutissarsiuteqartoq ataatsimoorussaasut isumaqatigiissutit naapertorlugit atugassaqartitaappat.

Inatsisissatut siunnersuummut oqaaseqaatini ersippoq isumaqatigiissutit naapertorlugit atorfinitsitsisoqarnerani akerleriissutaasut aallaavittut isumaqatigiissutaasunik unioqqutitsinertut suliarineqartussaasut, eqqartuussivinniunngitsiq. Tamatuma saniatigut siunnersuummut oqaaseqaatini ersippoq, taartisiatut ajunngitsorsiassat assigiinngitsorujussusinnaasut, ajunngitsorsiassat aalajangersarneqartussaammata sulisunut akerleriissutaasut sulisartut eqqartuussivii aqqutigalugit suliarineqartarnerinut sanilliunneqartunik. Inatsisissamut siunnersuut oqaaseqaatillu assigiingitsunik paasineqarsinnaasutut isikkoqarput, taartisiatut ajunngitsorsiassat inatsisissatut siunnersuummi aalajangersimasorujussuummata, kiannili inatsisissamut siunnersuummut oqaaseqaatini aalajangersimanatillu akerleriissutaasunik suliaqartarnermut aaqqissuussinermut pitussimangitsutut illutik.

AK-p nalilerpaa tamatuma kingunerissagaa sulineramik inuussutissarsiuteqartut peqatigiiffiini ilaasortaannngitsut, kiisalu isumaqatigiissuteqarfiunngitsut suliffeqarfiit pissarsiaasaqartinneqartut aaqqissuussinikkut, siunnersuut peqataassammat akuersinissamut taartisiatut ajunngitsorsiassat appasinnerunissaannut, inatsisissamullu siunnersuummi taartisiatut ajunngitsorsiaqartitsineq ilimanarluni sulisunut ilaasortaaffeqartunut atatillugu akerleriissutaasut suliarineqartarnerannut aaqqissuussinermut sunniuteqarnerluttussatut, paarlattanik pinnani.”

*Isumaginninnermut, Suliffeqarnermut Nunamullu Namminermit Naalakkersuisoqarfiup akissutaa.*

*Taartisiassat qaffasissusissaat aqunneqarput § 6-imi. Naalakkersuisut akiliutaasussat § 6 naapertorlugu killiliussassat nalilersimavaat naapertuuttut. Akiliutaasussat killiliussat Danmark-imi akiliutaasartut annertoqatigaat.*

*Taartisiassat annertussusissaat ersarinnerusoq ulluinnarni eqqartuussivitsigut aammalu sulineramik inuussutissarsiuteqartut sulisitsisullu akornanni akerleriissutaasunik suliaqartarnermut sulisartut eqqartuussivianni aaqqissuussinertigut aalajangersarneqartarumaarput.*

”Ilanngullugulu tikkuarneqarpoq taaguut ”isumakkeerfigineqarsinnaasoq” tunngatillugu amigaatinut amerlasuutigut oqaasertat qanoq paasineqarsinnaaneritik apeqqusersuisinnaanerit eqqarsaatigalugit, sulianillu ingerlatsinernik pisarissersuisinnaanerit, sulisitsisunut kiisalu sulineramik inuussutissarsiuteqartunut. Sulisitsisoq qaammammik piffissaqarpoq siunnersuut naapertorlugu pisussaaffimminik naammassinninnissaminut, tamannalu naammattorujussuussaaq ulapinnermi isumagisassat naammassiniartarnerinut, “isumakkeerfigineqarsinnaasullu” amigaatit suliarinissaannut. Taamaattumik AK-p isumaqatiginngilaa taartisiatut ajunngitsorsiassanut qaffasinnerpaamik 1000 kr.-inik annertussusiliisoqarnera, amigaataasut isumakkeerfigineqarsinnaappata, pissutsillu

atorfeqarnermut namminermut isumaqanngippata imaluunniit pingaaruteqanngippata. AK-p tamanna tunngavigalugu inassutigissavaa tamatumani oqaaseqatigiit taartisiassanullu qaffasissusissaq 1000 kr. siunnersuummiit peerneqassasut, taamaassanngippallu taartisiassat annertussusissaat malunnaatilimmik qaffanneqassasut.”

*Isumaginninnermut, Suliffeqarnermut Nunamullu Namminermut Naalakkersuisoqarfiup akissutaa. SIK-mut apeqqummi assingusumi akissuteqarnertulli assingusumik akissuteqartoqarpoq.*

*§ 6, imm. 1, oqaaseqatigiit sisamaat imatut allassimavoq: ” Taarsiissutisialli taamaattoq qaffasinnerpaamik 1.000 kr.-inik annertussuseqarsinnaapput, paasissutissiisimanninneq utoqqatsissutigineqarsinnaasumik pissuteqarpat, atorfeqarnermilu atugassarititaasunut tigussaasumik isumaqarsimanngippat. ”*

*Qaffasinnerpaamik 1.000 kr.-inik taarsiissutisiassat naleqquttuupput amigaataasut nalinginnaasuutillugit, assersuutigalugu suliffeqarfiup ingerlatsiffigisaata allanngornerani, tassalu adressip najugaata nuunnerani, kisiannili nalinginnaasunik ulapputeqarneq pissutigalugu atorfeqarnermut uppersaammik najukkap allannguutaanut atatillugu malinnaatitsinninnermi, sulinermillu inuussutissarsiuteqartup sukkuulluunniit sulisitsisup najugaanik nalornissuteqarfiginngisaani.*

*Assersuummi amigaataasoq pineqaraluarpormi, kisiannili amigaat pingaaruteqarsimannigilaq, sulinermik inuussutissarsiuteqartup sukkuulluunniit nalornissutigisimannimmagu najugaq nutaaq. Sulinermik inuussutissarsiuteqartoq nuunnerup kingorna najugaqarfimmuut adressimut pineqartumut takkuttarpoq. Pineqaatissiisuteqarneq pisuni taamaattuni takussutissiisutaannaassaaq.*

### **3. Sulisitsisut tusarniaanermi oqaaseqaataat**

”Sulisitsisut tulluuttunik inatsisissatut siunnersuummut oqaaseqaateqarput sulisitsisut sulinermik inuussutissarsiuteqartumut atorfeqarneq pillugu ilisimatitsisussaananeratt pillugu.

Ataatsimut Sulisitsisut ilungersuutigalugu sulissutigaat suliffeqarfiit ilaasortaasut atorfeqarnermut isumaqatigiissutinik /uppersaatinik suliaqartinniartarneri.

Kisianni atorfeqartitsisarneq pillugu inatsit allaffissornikkut oqimaatsuussanngilaq suliffeqarfinnut, inuussutissarsiutit sammiviisa ilaanni piffissani sivikitsukkaani sulisoqartoqartarmat, sulisullu akornanni assut taarseraattoqartarluni.

Suliffeqarfinnut tamakkununga allaffissornikkut assut oqimaarsaataasassaaq taakkua allaganngorlugit uppersaatinik suliaqartassappata akunnerni ikittuinnarni sulisittakkanut.”

*Isumaginninnermut, Suliffeqarnermut Nunamullu Namminermut Naalakkersuisoqarfiup akissutaa.*

*Siunnersuut sulisitsisunut allaffissornikkut oqimaarsaataavallaannginnissaa anguniarlugu siunnersuut allanngorinneqarpoq, sapaatip akunneranut agguaqatigiissillugu sulineq nalunaaquttap akunneri minnerpaamik 15-iussasut, arfineq-pingasuumatik.*

*Tusarniaanermi akissutaasup kingunerisaanik § 1, imm. 1 erseqqissarneqarpoq, ersarinnerulersillugu aalajangersakkami Inatsisartut inatsisaat taamaallaat atortinneqartussaasoq sulinermik inuussutissarsiuteqartunut qaammat ataaseq*

*sinnerluguluunniit suliffeqartunut agguaqatigiissillugu minnerpaamik akunnerni 15-ni sap. ak. sulisinneqartartunut.*

*Killiliineq tamatuma saniatigut maannamutut aamma inatsimmut oqaaseqaatini § 1, imm. 1-imut atatillugu ersippoq.*

”Isumaliutigineqarsinnaavoq uppersaammik tunineqarnissamut pisinnaatitaaffik qaammat imaluunniit qaammatit marluk suliffeqareernermit atortuulertassanersoq. Sulisitsisut SIK-mut isumaqatigiissutaanni sulinermit inuussutissarsiuteqartut atorfeqarnermut isumaqatigiissummik pisinnaatitaapput qaammatini 3-ni atorfeqareernermit.”

*Isumaginninnermut, Suliffeqarnermut Nunamullu Namminermut Naalakkersuisoqarfiup akissutaa.*

*Qaammammik 1-imik piffissaliineq § 1, imm. 1-imi ersippoq. Killiliussa qaalajangersarneqarpoq atorfeqarnerup aallartinneraniit siusissukkat ersarissisassamat atorfeqarnermit atugassarititaasut qanoq ittuunissaat. Malittarisassat pineqartup danskit tamatumunnga malittarisassaat assigaa, danskillu malittarisassaanituulli siumut suliffeqarfinnut naatsorsuutigineqareersinnaasarpoq Kalaallit Nunaanni aamma Danmark-imi ingerlatsisuusunut.*

”§ 1, imm. 1-imi ersippoq inatsit sulinermit inuussutissarsiuteqartunut atuuttusoq, sap. ak. minnerpaamik akunnerni 8-ni sulisartunut.

Sulisitsisut inassutigissavaat atorfeqarnermut uppersaammik pisinnaaneq aatsaat atortuulertassasoq sulinermit inuussutissarsiuteqartoq sap. ak. agguaqatigiissillugu akunnerni 15-imi sulisartut.”

*Isumaginninnermut, Suliffeqarnermut Nunamullu Namminermut Naalakkersuisoqarfiup akissutaa.*

*Sulisitsisunit siunnersuut malinneqarpoq, aamma § 1, imm. 1 allanngortinneqarpoq sapaatip akunneranut nalunaaquttap akunneri minnerpaamik 15-t sulisoqassasoq.*

”Aamma piunarsaqateqarpoq agguaqatigiissillugu sap. ak. akunnerni 15-imi sulisarnissaq sulinermit inuussutissarsiuteqartut atorfilittut naatsorsuunneqartartut eqqarsaatigalugit, tak. § 1, imm. 2, FL-imi.

*Isumaginninnermut, Suliffeqarnermut Nunamullu Namminermut Naalakkersuisoqarfiup akissutaa.*

*Sulisitsisunit siunnersuut malinneqarpoq, aamma § 1, imm. 1 allanngortinneqarpoq sapaatip akunneranut nalunaaquttap akunneri minnerpaamik 15-t sulisoqassasoq.*

#### **4. Kommune Kujallermit tusarniaanermut akissutit**

”Qujanaq tusarniaanermut akulerunneqaratta.

Kommune Kujalleq imaattunik inatsisissatut siunnersuummut oqaaseqaateqassaaq:

Kommunit pisussaaffigaat sulisuminnut atorfeqarnermi atugassarititaasunik isumaqatigiissutit atuuttut suliassa qarfimmi pineqartumi / imaluunniit sulisup qanoq ilinniarsimanera naapertorlugit aaqqissuussisussaaneq.

Isumaqatigiissutit naapertorlugit atorfinittitsisarnerni atuuppoq isumaqatigiissut pineqartoq atuuttoq naapertorlugu minnerpaatut atorfeqarnermi atugassarititaasunik aaqqissuussisarneq.

Siunnersuummut oqaaseqaatini immikkoortumi siullermi “Oqaaseqaatit nalinginnaasut” nr. 3 aamma nr. 4-ap ataani eqqaaneqarput kommunit aamma Namminersorlutik Oqartussat - sulisitsisutut – ullumikkut atorfeqarnermut allakkiqartarnermik atuisooreersut, inatsisissamut siunnersuummi pineqartunut atatillugu.

Kommuninut attuumassuteqartutut nutaajupput ukua

1. § 2, imm. 1-imi oqaatsinut atatillugu oqaaseqaatit – qularnaarneqassasoq sulisitsisumit sulineramik inuussutissarsiuteqartup atorfeqarnermut isumaqatigiissut paasisinnaassagaa.
2. Oqaaseqaat § 4, imm. 1-imut Kalaallit Nunaannut suliarortitsisarneq, tassa illoqarfimmi /nunaqarfimmi allami suliffeqariartortarneq, qaammatit 3-it sinnerlugit sivilisussuseqartartoq.

Tamatumunnga kommuni annerusunik oqaasissaqanngilaq.

Eqqumiiginartinneqarpoq § 1, imm. 5, inatsimmi, imminnullu akerleriittutut nipeqarlutik inatsisip nammineq siunertaanut sanilliullugu isiginiaraanni, siunnersuummi § 2, imm. 4, qularnaarneqassammat sulineramik inuussutissarsiuteqartup atorfeqarneq pillugu uppersaatinik tunineqartussaananeranut atasumik atorfeqarnerup qanoq ittuunissanut piunarsaqaatitaqannginnera, qaammat ataaseq sinnerlugu sivilisussuseqartunut, sap. ak. 8-imi sulisussaananerup saniatigut.

Allaganngorlugu pisussaaffeqarnermik piunarsaqaat taamaattoq isumaqarnavianngilaq oqaasiinnartigut atorfeqarmissaq pillugu isumaqatigiissutaasup atorunnaarnera, kisiannili taamaallaat uppersaasooqassalluni atsiornikkut illuatungeriinnit kingusinnerpaamik qaammatip 1-ip qaangiunnerani, sulinermik inuussutissarsiuteqartoq ilumut suliffeqartoq, oqaasiinnartigut isumaqatigiissut naapertorlugu.

*Isumaginninnermut, Suliffeqarnermut Nunamullu Namminermut Naalackersuisoqarfiup akissutaa.*

*Inatsisartut inatsisaanni siunertaanngilaq qaqugukkut isumaqatigiissutaasut atuunnissaannik imaluunniit suliassap suliarineqarsimanera uppersaarnissaanut qulakkeerinnissaq pillugu aqutsinnissaq. Siunertaasoq siullertut pingaarnertullu tassaavoq atorfeqartitsisarnermi atugassarititaasunik ersarissaasoqarnissaa.*

## 5. Qeqqata kommunianiit tusarniaanermi akissutit

”Qeqqata Kommuniata qujassutigaa tusarniaanermi akissuteqarnissamut periarfissaqarnera, pisortaasullu peqatigalugit nassiunneqartut misissorsimallugit, immikkullu ittumik akueralugu piffissaliineq sivikitsuinnaasoq, isiginiaraanni nutaamik inatsisissaq matumani pineqarmat. Qeqqata Kommunia inatsisissatut siunnersuummut oqaaseqaatissaqarpoq, taanna kommunimi

allaffissornermut sunniuteqartussaammat. Taamaattoq Qeqqata Kommuniata nuannaarutigaa kiisami matumani ajornartorsiutaasoq iliuuseqarfigineqalermat, sulinermik inuussutissarsiuteqartunik illersuinikkut, qularnaarumallugulu sulisitsisup pisussaaffini naammassisimangippagu iliuuseqarsinnaaneq, sulinermik inuussutissarsiuteqartup ilisimatinneqartussaanera atorfeqarnermi atugassarititaasunik, pisortani aamma namminersortuni suliffeqarnermi. Tamatumunnga Qeqqata Kommunია kissaatinik nalunaarsuivoq, inatsimmi imaluunniit inatsimmut oqaaseqaatini allassimasinnaasunik:

1. Inatsisissatut siunnersuummi § 1, imm. 2-mi allassimavoq Inatsisartut inatsisaat atortinneqassanngitsoq sulisitsisup pisussaaffeqareerpat ataatsimoorussamik isumaqatigiissutisigut atorfeqarneq pillugu sulinermik inuussutissarsiuteqartumut paasissutissiisusaanermik. Oqaaseqatigiit taakkua kommunip nutaamik allanneqartussaasorai, atorfeqarnermut isumaqatigiissummi allassimangippat, immaqa kukkunikkut ataatsimoorussamik isumaqatigiissut atortussaataasoq, paarlattuaningitsoq. Tassa imaappoq, atorfeqarnermut isumaqatigiissut atortussaasusaanngitsoq, atugassarititaasut ilaat allassimangippat imaluunniit kukkusumik allanneqarsimappat, kisianni ataatsimoorussamik isumaqatigiissut atuuttusoq.”

*Isumaginninnermut, Suliffeqarnermut Nunamullu Namminermut Naalakkersuisoqarfiup akissutaa.*

*Siunnerfiunngilaq Inatsisartut inatsisaatigut isumaqatigiissuteqartarnikkut aaqqissuussinerit allannngortinneqarnissaat, imaluunniit piumasaqaatinik aaqqissuussinissat, isumaqatigiissutaasut atuuffigisaanni. Soorluttaaq siunnerfiunngitsoq Inatsisartut inatsisaatigut aqunneqassasut qaqugukkut isumaqatigiissut atortussaannersoq atortussaanningsorluunniit.*

*Siunertaasoq siullertut pingaarnertullu tassaavoq peqataanissaq ersarissaanermi atorfeqarnermi atugassarititaasut atuuttuusut qanoq ittuunerannik, qularnaarumallugu sulisitsisup sulinermik inuussutissarsiuteqartumut atorfeqarnermut atatillugu atugassarititaasunik paasissutissiisarnissaa.*

”2. Kissaataasup aappaa aamma sulisitsisup aamma inatsisitigut sulisorisaq assigiinngitsunik peqquteqartumik suliunnaarpat, sulisinnaajunnaarnikkut pisussaaffeqassasoq sulisimanermut uppersaammik tunniussaqaarnissamut, sulinermik inuussutissarsiuteqartup sulisitsisumut nutaamut tunniussinnaasaanik.”

*Isumaginninnermut, Suliffeqarnermut Nunamullu Namminermut Naalakkersuisoqarfiup akissutaa.*

*Tusarniaanermi akissutaasoq malinneqanngilaq.*

”Kissaataasut pingajuat tassaavoq inatsisissamut siunnersuummi nutaami § 1, imm. 6-imi allassimasoq Inatsisartut isumaqatigiissutini aalajangersakkanik sanioqqutsitsisinnaannginneri. Paasinarmat ataatsimoortinneqartut misiligummik sulilersitsisarnerit, piffissalikkamik sulilersitsisarnerit aamma ataavartumik atorfinitsitsisarnerit, Qeqqata Kommuniata kissaatigaa piffissalikkamik atorfinitsitsinerit /taartaasarneq / suliniutini suleqataasarneq danskit inatsisaat malillugit, piffissami killilimmi atorfeqartitsisarneq § 5, imm. 1 naapertorlugu, piffissami killilimmi atorfeqartitsisarnermut tunngatillugu. Taamatut allassimasoqarmat § 5 imm. 1-imi Piffissami killimmi

atorfeqartitsinerit arlaleriarlugit sivitsorneqarsinnaaneri taamaallaat pisinnaavoq pissutsit kinaassusersiunnngitsut tunngavigalugit, taamaattoq tak. imm. 2. Tamatumani assersuutigalugu pineqarput atorfeqarnermik sivitsuinerit, 1) naatsorsuutigineqariinngitsumik tunngavilimmik napparsimalernej, naartuneq, meerartaarnej, sulinnigiffeqarnej, qinikkatut sulineq.”

*Isumaginninnermut, Suliffeqarnermut Nunamullu Namminermut Naalakkersuisoqarfiup akissutaa.*

*Inatsisartut inatsisaatigut siunertaanngilaq isumaqatigiissuteqartarnerni atugassarititaasunik malittarisassanik aqutsinissaq. Tamatumani aamma siunertaanngilaq Inatsisartut inatsisaatigut malittarisassiornissaq qaqugukkut isumaqatigiissuteqartoqarsinnaaneranik taamaaliorinnaannginnermilluunniit.*

*Siunertaasoq siullertut pingaarnertullu tassaavoq atorfeqarnermi atugassarititaasut ersarissarneqarnissaannut peqataanissaq atorfinitsitsisarnermi, qularnaarumallugu sulisisisup sulinerimik inuussutissarsiuteqartumut atorfeqarnermi atugassarititaasut pillugit paasissutissiisarnissaa.*

*Piffissani killilinni atorfinitsitsisarnerit pillugit malittarisassiorsinnaaneq Inatsisartut inatsisaata matuma suliassaasa avataaniippoq, soorluttaaq inatsisitigut aqutsinerni namminerni inatsisiliornermi periaasissat nalinginnaasut malinneqarnissaat.*

”Qeqqata Kommuniata allaffissornikkut ingerlatsineranut inatsisissatut siunnersuut kommunimi allaffissornikkut pitsaanagerusumik aqutsinissamut aqutissiusseqataassaaq. Ullumikkut qaammammusiiallit kisimik atorfeqarnermut isumaqatigiissummik peqartarput. Qeqqata Kommuniata aallartereernikuuvaa atorfinitsitsisarnermut isumaqatigiissutinik assigiissaarnej, tamannalu inatsisinik atortitsinerim atorfinitsitsisarnerit assigiissaarneqarnerannik kinguneqassalluni.”

*Isumaginninnermut, Suliffeqarnermut Nunamullu Namminermut Naalakkersuisoqarfiup akissutaa.*

*Oqaaseqaateqanngilaq.*

## **6. Kommuneqarfik Sermersuumiit tusarniaanermi akissutit**

”Aallarniutigalugu Kommuneqarfik Sermersooq qujjumavoq inatsisissatut siunnersuutip tusarniaassutigineqarnerani akissuteqarsinnaanerminut.

Kommuneqarfik Sermersooq inassuteqassaaq taamatut inatsisiliornissaq pisortat ingerlatsinerannut tulluutinngitsaq, taamaallaalli allaffissornikkut ilassutitut aningaasartuutinik pilersitissalluni, kommunip sulisullu akornanni inatsisitigut atugassarititaasunik allannguinnngitsumik.

Tamanna tunngavilerneqarpoq kommune pisortat ingerlatsivigimmassuk pitussimasuullunilu isumaqatigiissutinut taamaallaat pinnani, kisianni aamma pisortat ingerlatsinerannut atatillugu malittarisassanut. Taamaattumik kommune pisussaareerpoq paasissutissiisarnissamut aalajangiinernut atatillugu, kiisalu taamaattuni aamma illuatungeriinnik tusarniaasussaareerluni, taamaattumillu sulisuusaq inatsisitigut pitsaanagerusumik inissimasussaanani, paasissutissanik tunineqarnissamut pisinnaatitaaneq eqqarsaatigalugu.”



*Isumaginninnermut, Suliffeqarnermut Nunamullu Namminermut Naalackersuisoqarfiup akissutaa.*

*Inatsisartut inatsisaata sulisitsisoq pisussaaffilerpaa sulinermik inuussutissarsiuteqartumut paasissutissanik tunniussisarnissamik atorfeqarnermi atugassarititaasuni ersarinnerusunik immikkuualuttortalersukkani.*

*Suliassaqarfik taanna pisortat ingerlatsiviannut atasuusoq isumaqatigiissutit kiisalu ingerlatsinikkut malittarisassat kisiisa aqqutigalugit isumannaassallugu nalilerneqarpoq pissusissamisunnngitsutut.*

*Inatsisartut inatsisaatigut qularnaarneqassapput malittarisassat ersarissut, sulinermik inuussutissarsiuteqartut sulisitsisuniit paasissutissanik erseqqissunik suussusilersugaasunik atorfeqarnermini atugassarititaasunut atatillugu malittarisassaqaarsinnaaqqullugit.*

*Inatsisartut inatsisaanni piumasarineqartut paasissutissat tassaapput tunngaviulluinnartut naatsorsuutigineqartartut sulisitsisup ilisimariigaatut - taakkualu tassaapput tunngaviusut suliffeqarfiup sumiinneranik, akissarsianik atuuttunik, soraarnissamut ilisimatitserneernissamik piumasagaatit, taamaattoqarpat isumaqatigiissut atuuttoq suunersoq, sulisitsisup atia, najugaa aamma atorfik suunersoq imaluunniit suliassat allassimaffiat, sulisitsisup atia najugaalu, nalinginnaasumik ullormut imaluunniit sap. ak. akunnerit suliffiusussat, sulinngiffeqartarnermi suut malitassaanersut, atorfeqarneq piffissami killiligaanngitsumi killilimmiluunniit atuuttuunersoq, kiisalu qanga atorfeqarneq aallartissimanersoq.*

*Siunnersuummi § 8, imm. 2-mi allanneqarpoq piffissamut ikaarsaarfiusumut atatillugu aalajangersagaq, sulisitsisumik qaammatini 6-ini Inatsisartut inatsisaata atuutilerfiata kingorna piffissaliisoq, Inatsisartut inatsisaat naapertorlugu sulinermik inuussutissarsiuteqartumut atugassarititaasunik atortuulersitsinissamut, sulinermik inuussutissarsiuteqartunut inatsisartut inatsisaata atuutilernera sioqqulluguli sulisuusunut atatillugu.*

*Inatsisartut inatsisaata piviusunnngortinnissaa eqqarsaatigalugu, siunnersuummi § 7 allannngortinneqarpoq, atuutilerfissaa ulloq aalajangersimasoq pineqarunnaarluni, kisianni Naalackersuisut atuutilerfissaa pillugu nalunaarummik akuersissuteqarpata pisussanngorlugu. Taamatut iliornermi sulisitsisut inatsisartut inatsisaata atuutilernissaanut piffissaqassapput piareersarnissaminut. Ajornartorsiut manna pillugu nassuiaammut nalinginnaasumik oqaaseqaatini immikkoortoq 3 innersuussutigineqarpoq.*

*Inatsisartut inatsisaat atugassarititaasut minnerpaaffissaannut inatsisaavoq, qularnaarisoq sulinermik inuussutissarsiuteqartut atorfeqarnermini atugassarititaasunut tunngatillugu paasissutissanik minnerpaamik qanoq ittunik tunineqartarnissaannik. Isumaqatigiissutinik nassaassaqartarpoq sulisitsisumik pisussaaffiliisunik paasissutissat pineqartut assinginik sulisuminnut tunniussisarnissaannik. Sulisitsisut aamma sulinermik inuussutissarsiuteqartut aamma ataasiakkaarlutik nammineq isumaqatigiissuteqarsinnaapput paasissutissanik Inatsisartut inatsisaanni pineqartunut annertunerusunik tunniussisoqartarnissaa pillugu.*

”Kommune taamaallaat allaffissornikkut aningaasartuutinik akiligassinneqassaaq suli annerusunik nakkutilliinikkut aqqissuussinermigut inatsit naapertorlugu atorfeqarnermi

isumaqatigiissutaasunik nakkutilliinernut, soorluttaaq atorfeqartut toqqaannartumik periarfissineqassasut paasisutissanut malittarisassat allat naapertorlugit pissarsiarisinnaasaminnut aningaasatigut ajunngitsorsianik pissarsisarnissamut.”

*Isumaginninnermut, Suliffeqarnermut Nunamullu Namminermut Naalakkersuisoqarfiup akissutaa.*

*Pissusissamisoortutut isigineqarpoq sulisitsisut pisussaaffilerneqarnissaat sulisuminnut atorfeqarnermi atugassarititaasunik pingaaruteqartunik tunniussaqaartarnissamut. Tamannami ilaatigut peqataasinnaavoq suliffeqarnermi atugassarititaasut akimut ersinnerusumik aaqqissuunneqarnissaannut, toqqissisimanermik annertunerusumik pilersitsilluni sulinermit inuussutissarsiuteqartunut, suut isumaqatigiissutaasimanersut, taamaaliornikkullu akerleriissutaasinnaasunik pinngitsoortitsilluni sulisitsisut aamma sulisut akornanni.*

*Ajunngitsorsiaqarnissamut atatillugu malittarisassanut tunngatillugu pissusissamisoortutut isigineqarput, naak sulinermit inuussutissarsiuteqartut malittarisassat pioreersut aqutigalugit paasisutissinneqarsinnaagaluartut.*

*Siunnersuummi § 8, imm. 2-mi ikaarsaanermi aalajangersagaqarpoq, atuutilernerata kingorna sulisitsisunut qaammatinik arfinilinnik Inatsisartut inatsisaata piviusunngortinneqarnissaanut sulinermit inuussutissarsiuteqartut inatsisip atuutilernissaa sioqqullugu atorfinitsinneqartunut. Tusarniaanermi akissutit tunngavigalugit aamma atuutilernissaanut aalajangersagaq allanngortinneqarpoq, atuutilernerani ulloq aalajangersimasoq pineqarunnaarluni. Alerliganik Inatsisartut inatsisaat atuutilersinneqassaaq Naalakkersuisut nalunaarummik akuerisissuteqarneratigut. Tamanna pillugu oqaaseqaatinut allanut nalinginnaasumik oqaaseqaatinut immikkoortoq 3 innersuussutigineqarput.*

”Inatsisissatut siunnersuummut atatillugu oqaaseqaatini immikkoortumut 3-mut Inatsisissatut siunnersuut una kommuninut aningaasartuutininik malunnaatilinnik kinguneqassaaq allaffissornermut atorfeqarnerillu nakkutiginerinut, tamatumanilu kommunit annertuunik aningaasartuuteqassallutik kukkunernut ajunngitsorsiaqartitsinernut, maanna malittarisassat atuuttut naapertorlugit pisariaqartinneqanngitsut.”

*Isumaginninnermut, Suliffeqarnermut Nunamullu Namminermut Naalakkersuisoqarfiup akissutaa.*

*Siunnersuummi § 8, imm. 2-mi ikaarsaanermi aalajangersagaqarpoq, atuutilernerata kingorna sulisitsisunut qaammatinik arfinilinnik Inatsisartut inatsisaata piviusunngortinneqarnissaanut sulinermit inuussutissarsiuteqartut inatsisip atuutilernissaa sioqqullugu atorfinitsinneqartunut.*

*Tusarniaanermi akissutit tunngavigalugit aamma atuutilernissaanut aalajangersagaq allanngortinneqarpoq, atuutilernerani ulloq aalajangersimasoq pineqarunnaarluni. Alerliganik Inatsisartut inatsisaat atuutilersinneqassaaq Naalakkersuisut nalunaarummik akuerisissuteqarneratigut. Tamanna pillugu oqaaseqaatinut allanut nalinginnaasumik oqaaseqaatinut immikkoortoq 3 innersuussutigineqarput.*

”Tamatumani saniatigut aalajangersakkanut ataasiakkaanut imaattunik oqaaseqaateqassaagut:

§ 1, imm. 1-imut: soorlu aallaqqaataani oqaatigineqareersutut inatsit una namminersortunut taamaallaat atortussaatinneqartariaqaralarpoq.”

*Isumaginninnermut, Suliffeqarnermut Nunamullu Namminermut Naalackersuisoqarfiup akissutaa.*

*Pissusissamisoortinneqanngilaq Inatsisartut inatsisaata inuussutissarsiortunut namminersortunut kisimi atortinneqarnissaa, pisortanit ingerlatsiviinut pinnagu.*

*Kiisalu siuliani akissutaasunut aamma innersuussisoqassaaq.*

”§ 1, imm. 1-imut: Atorfillit pillugit inatsimmi § 1, imm. 2 innersuullugu sap. ak. agguaqatigiissillugu piffissaq suliffiusussaq allanngortittariaqaralarpoq akunnernut 15-inut, assigiissikkumallugit atorfillit pillugit inatsit aamma atorfeqarnermik uppernarsaasarnermut inatsisit.”

*Isumaginninnermut, Suliffeqarnermut Nunamullu Namminermut Naalackersuisoqarfiup akissutaa.*

*Tusarniaanermi illuatungiliuttumit siunnersuut malinneqarpoq. § 1, imm. 1 allanngortinneqarpoq, taamaalilluni sapaatip-akunneranut agguaqatigiissillugu nalanaaquttap-akunneri 15-it sulisoqassasoq, nalunaaquttap-akunneri arfineq-pingasunut paarlaallugit.*

”§ 1, imm. 3-mut: Inatsit pisortat suliffiutaanni taamaakkaluartoq atortinneqassappat, tak. siuliani § 1, imm. 1-imut oqaaseqaatigineqartut, atorfilittut tjenestemandiusutut atorfeqarnerit, aamma tjenestemandinut assingusunik atorfeqarnerit aamma pisortani atorfeqarnerit allat Inatsisartut inatsisaanni ilaatinneqassanngillat.”

*Isumaginninnermut, Suliffeqarnermut Nunamullu Namminermut Naalackersuisoqarfiup akissutaa.*

*Siuliani akissutigineqartut innersuunneqassappat, taamaattumillu Inatsisartut inatsisaat pisortat suliffiutaanni / ingerlatsiviini atortinneqartariaqarpoq, namminersortut suliffiutaanisulli.*

*Pissusissamisoortinneqarsimannigilaq tjenestemanditut, tjenestemandinut assingusunik pisortanilu atorfeqarnerit allat Inatsisartut inatsisaanni aalajangersakkani ilaatinneqannginnissaat. Tamanna ilaatigut pissutigalugu Inatsisartut inatsisaat minnerpaaffissanut inatsisaammat, pisariitsunnguullunilu.*

*Naalackersuisoqarfiup naliliineraa pissutsit pisariitsut paasiuminaallisarneqassasut sulinermik inuussutissarsiuteqartunik amerlavallaanik Inatsisartut inatsisaata atuuffigisassaani ilaangitsutut aqqissuussinermi nalunaarsuisoqassagaluarpat.*

”§ 1, imm. 6-imut: Aalajangersakkamut tassunga oqaaseqaatit aalajangersakkap oqaasertaaniittariaqaralarput, erseqqissisikkumallugu qaqugukkut pisinnaatitaaffiit sanioqqunneqarsinnaaneri, inatsimmut oqaaseqaatini taamaallaat pinnagu.”

*Isumaginninnermut, Suliffeqarnermut Nunamullu Namminermut Naalackersuisoqarfiup akissutaa.*

*§ 1, imm. 6 erseqqissaavoq Inatsisartut inatsisaat atugassarititaasut minnerpaaffissaannut inatsisaasoq, sulinermik inuussutissarsiuqartumut atugassarititaasunik ajornerulersitsisumik sanioqqunneqarsinnaanngitsoq. Aalajangersakkamut nassuiaatitut oqaaseqaatit aaqqissuussaapput tusarniaanernit akissutaasartut tunuliaqutaralugit, ersarissikkumallugu inatsit minnerpaaffissatut atuuttuusoq.*

*Inatsisit aaqqissuussaaneranniit isigalugu pisariaqartinneqarsimangilaq § 1, imm. 7-imut innersuussineq inatsimmut oqaaseqaatini toqqaannartumik § 1, imm. 6-imi allassallugu.*

*”§ 1, imm. 7-imut: Aalajangersarneqartariaqaraluarpoq aalajangersagaq taamaallaat aalajangersarneqarsinnaasoq suliffeqarnermi illuatungeriinnik aamma kommuninik isumaqatigiinniareernikkut, taamaaliortoqartariaqaraluarporlu qularnaarumallugu kommunit Kalaallit Nunaanni sulisut ilarparujussuinik sulisitsisusut maleruagassanik allannguinninnermi tusarniarneqartarnissaat.”*

*Isumaginninnermut, Suliffeqarnermut Nunamullu Namminermut Naalackersuisoqarfiup akissutaa.*

*Pissusissamisoortinneqanngilaq tusarniaasarnermik pisussaaffimmik aalajangersakkami ilanngussinissaq. Nalunaarummik atulersitsinermi, tusarniaanermi najoqqutassiat nalinginnaasut malinneqassapput, tamannalu naammattutut isigineqarluni.*

*”§ 2, imm. 2-mut: § 2, imm. 1-imut piumasagaat isiginiarlugu aalajangersarneqartariaqaraluarpoq ‘Sulisitsisoq kalaallisut, pisariaqarpallu danskisut paasisutissiinissamik pisussaaffeqarpat, taava sulisitsisup oqaatitsigut paasisutissiinissani naammassisimassagaa.”*

*Isumaginninnermut, Suliffeqarnermut Nunamullu Namminermut Naalackersuisoqarfiup akissutaa.*

*Maanna § 2, imm. 1 aamma 2-mi oqaasertaliineq pissusissamisoortinneqarsimavoq. Aalajangiisuusoq tassaavoq sulinermik inuussutissarsiuqartup paasisutissanik oqaatitsigut paasisinnaasamigut tunineqartarnissaa, tamannalu § 2, imm. 1-ip kinguneraa. Tamanna sulisitsisunut aamma sulinermik inuussutissarsiuqartunut eqaatsumik iliorsinnaatitsivoq.*

*§ 2, imm. 2 tamatuma saniatigut aalajangersaavoq piumasagaammik paasisutissat qinnuteqartoqarneratigut kalaallisut aamma danskisut tunniunneqartarnissaannik.*

*”§ 2, imm. 3, nr. 10-mut: Nassuiaatitut oqaaseqaatinut, tassani innersuussineq “SIK-p isumaqatigiissutaa” naammassaaq, ilisimatitsissutigineqarmat peqqissaanermut ikiortit atorfeqartinneqartoq ilaasoq Naalackersuisut aamma SIK-p peqqissaasut pillugit isumaqatigiissutaanni aalajangersarneqartunut, atorfeqartitsinikkullu ersarissamat inuk pineqartoq isumaqatigiissummut sorlermut ilaanersoq.”*

*Isumaginninnermut, Suliffeqarnermut Nunamullu Namminermut Naalackersuisoqarfiup akissutaa.*

*Aalajangersagaq naapertorlugu ersarissuussaaq isumaqatigiissut ataatsimoorussaq sorleq imaluunniit isumaqatigiinnikkut aalajangikkat qanoq ittut atorfeqarnermi pineqartumi pineqarnerisut. Tamanna pisuni namminerni ataasiakkaani aalajangerneqartariaqarpoq naammannersoq.*

”§ 4, imm. 2-mut: Oqaasertaa allangortinneqartariaqaraluarpoq, `...§ 2, imm. 4-mi eqqaaneqarput pappialaatit, § 2, imm. 5 assigisaanik atortinneqassaaq.”

*Isumaginninnermut, Suliffeqarnermut Nunamullu Namminermut Naalackersuisoqarfiup akissutaa.*

*§ 4, imm. 2 imaqannqilaq oqaasertaliinermik ”, § 2, imm. 5 assigisaanik atortinneqassaaq”. Innersuussineq § 4, imm. 2-mut § 2, imm. 5 suliarineqassanngilaq pissutigalugu § 2, imm. 5-mi pineqarmat qanoq sulisitsisup paasissutissiisinnera sulinngiffeqartarnej, soraarsitsisarnej – soraarniuteqartarnej, akissarsiat il.il. aamma ullumut imaluunniit sap. ak. suliffiusussanut tunngasunik.*

*§ 4, imm. 2-mi pineqarput sulisitsisup ilassutitut paasissutissanik tunniussisussaanaera sumiiffimmut allamut suliarortitsinermi. Taamaattumillu pissutissaqannqilaq § 2, imm. 5-imut innersuussissalluni, paasissutissat § 2, imm. 5-imi pineqartut sulinermik inuussutissarsiuteqartumut tunniunneqartussaareermata § 2-mi aalajangersakkat naapertorlugit.*

*Sulinermik inuussutissarsiuteqartumut sumiiffimmut allamut suliarortitaasarnermut atatillugu paasissutissat pingaaruteqartutut isigisariaqarmata, pissusissamisoorinneqarsimannqilaq isumaqatigiisummut innersuussiinnarnissaq, pineqartarmata paasissutissat suliassat qanoq siviisutiginissaannik sumiiffimmi allami suliarineqartussat, sulinermik inuussutissarsiuteqartumut atugassarititaasussat suliffiusumut nalinginnaasumut uternissami, aamma aningaasatigut allatigullu nalilitsigut ajunngitsorsiassat suliarortluni allami najugaqarallarnermut atatillugu.*

”§ 6, imm. 1-imut: Pisortani sulisitsisunut atuutinneqassappata pineqaatissiilluni akiliisitsinermi akiliutigineqartussat appasinnerujussuusariaqarput, pisortat pisussaaffeqareermata paasissutissiisarnissanut, taamaattumillu paasissutissiinissamik pisussaaffimmik naammassinninngitsoorneq sulianik ingerlatsisut kukkunerisassammassuk, pissusissamisuussananilu ajunngitsorsiartaqartitsinerit taamaattuni aalajangersakkamut siunnersuutitut annertussuseqarnissaat.”

*Isumaginninnermut, Suliffeqarnermut Nunamullu Namminermut Naalackersuisoqarfiup akissutaa.*

*Ajunngitsorsiassat annertussusissaat naapertuuttutut isigineqarput, eqqarsaatigalugu sulinermik inuussutissarsiuteqartumik ilisimatitsisussaaneq atorfeqarnermi atugassarititaasunik, aamma isiginiarlugu atorfeqarnermut uppernarsaasiisarnermut inatsit pisariitsunnguusoq, sulisitsisumiillu malikkuminartuulluni.*

*Inatsisartut inatsisaat naapertorlugu ajunngitsorsiassat annertussusissaat assigiinngitsunut 3-nut inissitaapput, pisuni namminerni pissutsit qanoq issimanerinek tunngaveqartunik. Tamatumani nalilerneqartussaavoq paasissutissiisimanninnerup qanoq sulinermik inuussutissarsiuteqartumut sunniuteqarsimanera – isumaqarnera, amigaataasorlu utoqqatissutissartaqarnersoq.*

*Amigaataasooq utoqqatissutissartaqarpat atorfeqarnermullu namminermut annerusutigut isumaqarsimannqippat, ajunngitsorsiassaq annerpaamik 1.000 kr.-iusinnaavoq.*

”Aalajangersagarlu tamatuma saniatigut kommunimut aningaasartuutaasussaavoq, aningaasartuutaasullu ataatsimoortumik tapiissutitsigut matussusigassaassallutik.”

*Isumaginninnermut, Suliffeqarnermut Nunamullu Namminermut Naalakkersuisoqarfiup akissutaa.*

*Naatsorsuutigineqassaaq kommunip Inatsisartut inatsisaanni aalajangersakkat piumasqaataasut malissagai, naliliisoqanngilarlu inatsisissamut siunnersuutip kingunerisaanik kommunini aningaasaliissutissanik immikkoortitsisoqarnissaa.*

*Eqqaaneqareersutut Inatsisartut inatsisaannik tunngaveqartumik ajunngitsorsiaqartitsisarneq immikkoortunut 3-nut aaqqissuussaavoq, pisut qanoq ittuuneri tamatigut apeqqutaatillugit. Tassanilu naliliinermi tunngavigineqassaaq paasissutissiinnginneq qanoq ittunik amigaatinik pinngortitsinersoq sulinermik inuussutissarsiuteqartumut utoqqatsissuteqarnikkut naammassineqaannarsinnaanngitsunik.*

*Siunnersuummi § 8, imm. 2-mi ikaarsaanermi aalajangersagaqarpoq, atuutilernerata kingorna sulisitsisunut qaammatinik arfinilinnik Inatsisartut inatsisaata piviusunngortinneqarnissaanut sulinermik inuussutissarsiuteqartut inatsisip atuutilernissaa sioqqullugu atorfinitsinneqartunut.*

*Tusarniaanermi akissutit tunngavigalugit aamma atuutilernissaanut aalajangersagaq allanngortinneqarpoq, atuutilernerani ulloq aalajangersimasoq pineqarunnaarluni. Alerliganik Inatsisartut inatsisaat atuutilersinneqassaaq Naalakkersuisut nalunaarummik akuerisissuteqarneratigut. Tamanna pillugu oqaaseqaatinut allanut nalinginnaasumik oqaaseqaatinut immikkoortoq 3 innersuussutigineqarput.*

”§ 6, imm. 2-mut: Ersittariaqarpoq kommunit suliffeqarnermi illuatungeriinnut ilaaneri.”

*Isumaginninnermut, Suliffeqarnermut Nunamullu Namminermut Naalakkersuisoqarfiup akissutaa.*

*Aalajangersagaq inatsisiliornermi aaqqissuussinernik tunngaveqartumik peerneqarnikuuvoq. Kommunit suliffeqarnermi illuatungeriinni pingaaruteqartumik inissisimapput.*

”§ 8-mut: Inatsit pisortat atorfinitsitsisarnerannut atuuttuussasoq aalajangiusimaneqassappat taamaallaat atortinneqassaaq atorfeqartitsilernernut 1. juli 2023-ip kingornagut pilersinneqartunut, atorfeqarnernulli ingerlasuunngitsunut.”

*Isumaginninnermut, Suliffeqarnermut Nunamullu Namminermut Naalakkersuisoqarfiup akissutaa.*

*Siunnersuummi § 8, imm. 2-mi ikaarsaanermi aalajangersagaqarpoq, atuutilernerata kingorna sulisitsisunut qaammatinik arfinilinnik Inatsisartut inatsisaata piviusunngortinneqarnissaanut sulinermik inuussutissarsiuteqartut inatsisip atuutilernissaa sioqqullugu atorfinitsinneqartunut.*

*Tusarniaanermi akissutit tunngavigalugit aamma atuutilernissaanut aalajangersagaq allanngortinneqarpoq, atuutilernerani ulloq aalajangersimasoq pineqarunnaarluni. Alerliganik Inatsisartut inatsisaat atuutilersinneqassaaq Naalakkersuisut nalunaarummik akuerisissuteqarneratigut. Tamanna pillugu oqaaseqaatinut allanut nalinginnaasumik oqaaseqaatinut immikkoortoq 3 innersuussutigineqarput.*